



梅山集
二十二

墓誌銘

廿二

^ 16
2373
23



2873
卷28-23

梅山先生文集卷之四十三

墓誌銘

醇溪李公墓誌銘 并序

嗚呼此醇溪李公之墓公闡崑科登顯仕不揭官名
稱其野號者以公平生志趣之在茲也公諱正履字
審夫系出璿源以 英陵別子桂陽君忠昭公諱增
爲始祖九傳至觀察使諱德英以直道爲 明陵名
臣公高祖也曾祖諱繼華祖諱輔天有至行隱德學
者私諡曰遺安處士考諱在誠文學清修爲 正廟
所獎謫拜寢郎不就三世俱以文行著名妣全州柳



氏縣監愍其考也公生稟異質纔成童已通詞藝稍長名聲藉甚丁卯成進士辛巳拜 康陵叅奉轉義禁府都事被辟換軍資監奉事料量出納默究糶糴轉運利病源委著邦積弊等說己丑出監宜寧縣邑俗勁悍吏多偷弄公諭之曰爾等奈何以父母所生之身冒姦僞偷竊之名廉耻羞惡是爾輩本心其各致告圖所以釐革於是皆相戒勿欺邑有退溪李文純公鄉約修舊起廢斟酌損益月季考校而施賞罰焉民俗大和邑糶屢萬石因積貯無法虛勘過半公欲依社倉式以條例議于上營道伯素與公異趣

而贊公治行第一風勵一路庚寅 翼廟諱音至守宰疑所服公據補編所載謂 上服當斬衰臣民則暮年率吏民舉哀成服奔慰道伯布巾麻屨齋衰服以往道伯巾經受慰諸守宰皆倉卒借服於公輪次成禮而出道伯詔公知禮辛卯遭艱居廬盡禮甲午純廟昇遐啜粥寢苦見人方喪儀節有不及古者嗚咽流涕乙未擢 登極慶科金陵南公公轍淵泉洪公爽周馳書相賀曰朝廷得人矣例付典籍丙申以記注官叅修 純廟實錄秋掌試關西士有通關節者諭之以義西士赴京試者聞之爭旋踵以東堂製

述非經生所習專取講誦額小人多無以刊汰則并
出付試儒公共圈點因爲榜目士皆羅拜輿前曰吾
師先生出矣除副校理始講論語首編進曰聖人之
學不過孝弟忠信仁愛也 殿下於此六字親切玩
味真實加工則聖學自然將就因及泛愛親仁之旨
曰人君於萬姓兆民之衆無一不愛遍覆均燾而若
不得仁賢有德之人而親近焉則邪佞雜進惠澤不
降臣願 殿下於大小臣僚必取此等人朝夕左右
誓御近侍亦取其小心謹慎不作罪過者敷求草野
學問才德之士甄拔獎用野無遺賢然後親仁之效

可及於八方矣後因晝講請兼行 召對於夜靜無
事昏惰易乘之時且令書進古事用備觀省公每當
進講宿齋豫戒至誠惻款 聖度淵默而於公屢有
顧問膺中獄起爲問事郎囚供叵測將網打摺紳時
洪公爽周以按獄大臣懼流毒一世倡僚相求 對
辭不達意而退彈章徑發持洪公甚急 上遽罷發
啓三司臺閣一空公適拜獻納不叅合啓而憲長聯
公名論不宜盡逐臺諫是時與洪公終始周旋知其
斷無他意者惟公而憲長疏語又非公所與聞也公
上章自引乞 賜斥退臺諫權大肯論以背公死黨

遂謫靈巖宥還嘉陵著採荒書講究常平遺法已亥
差節使書狀官比還京有洋賊越境現發就戮公憂
邊禁不嚴到灣上楊諭切戒雜俾淫巧及刷驅輩隳
突貽羞之習一行整肅復 命復拜校理進講齊烹
阿大夫事因曰治惡莫善於使之知恥 本朝立國
仁厚先教而後刑或有貪污不法者臺憲以墨漆其
門俾不得齒諸人至今憲隸有以墨尺名者 國朝
典章可與三代同稱者此類是也又言心體如鏡妍
媿莫逃必時磨濯塵垢不集然後此心常清事理瞭
然讀書進學卽其磨濯之具又因辭館職疏陳帝王

之學築根基立間架若大學衍義聖學輯要於聖贊
心法治國規模尤所詳列於此二書從容講究必有
裨於根基間架之學矣三月 上親祭 仁陵以執
禮敘勞陞通政拜工曹叅議六月出爲北青府使以
教化爲先務首訪篤行之士約會論學請業者館置
之授朱子書親正句讀閱禮俗賀賀分賜陶庵禮書
于鄉塾拜瞿圃李公明淵祠戒鄉士遵述教條 皇
明胡翰林克己自靖東來有遺祠在本邑公往拜之
銘其廟碑北地不產綿南賈褊褊衣敗絮以易北貨
而官從以征之公恥其無藝悉停之民獵鹿矢魚以

梅山先生集
爲業有獲輒讓而屬官公曰官欲需背魚自有俸錢
命置之有埋尸而誣富人拷死者公親往掘檢獄得
平反公素患腦癩歸而大肆出次外麻呼筆與季氏
書怡然而逝時癸卯七月二十七日也距其生甲子
一周未及晬二十一日公疾斃士民全集村婦頂香
祈瘳及喪奔走啼號如哭天倫值潦水漲髦士入水
牽輻奠誄加麻者甚衆八月厝于加平台峯里庚坐
從先兆也公忠恕成質淹博爲資濟以謙虛退約晨
謁家廟躬操畚箒祀享齋慎蠲潔洞屬常恨大宗祠
屋未建謀所以移近小宗舉四時正祭始祖私親慎

嬪墓在南陽倡諸孫行歲一祭祧位將遷于次房鄉
廬公自請替攝外先忌辰必助需寧不腆無闕是皆
孝之推也居恆慎默時政得失民生休戚隱約於眉
睫間常以居官者一切辦事而不本於教化心術爲
可耻自奉澹泊蔬糲不繼而念在於一世之飢者嘗
值荒年製紙囊納升米周族人窮乏俾免捐瘠少日
自塲屋歸見人寒餓仆地擔致邏幕俟其溫甦有人
值盜失衣冠曉以徒髻來告急輟與己具不問名姓
此類甚多不可殫記每出入筵席以成就聖德
自任而一時僚案趣味落落公慨然曰今日急務孰

有大於此者若不責我以他事俾得專意於此則必有以自効雖老死此職無恨也昔黃裳有云若欲進德修業追踵古先哲王須用天下第一等人公庶幾當之而罔卒其志願惜哉公少好學徧交當世名士如老洲吳文元公淵泉洪公臺山金公邁淳皆相與往復晚年專意四子程朱書曰吾儒家法畢竟歸宿於此嘗論心性命理之說曰本然氣質四者皆有之不可謂氣質屬心本然屬性也以程子所謂未發之中氣不用事有善無惡者爲宗旨日用之間察其發於理發於氣之分以爲從捨論知行先後以朱子所

謂隔斷中間兩致其功者爲度專對之行以此說與中州諸儒力辨陸王之偏枯爲諸儒之謳吟思明者述本國所講尊周大義俾補潛史之闕又述先正學術源流約附淵源錄之後嘗劇論民國利病必舉大學末章兩節之訓而屢致意焉且曰國奢示儉古人微權識賈三倍詩人所歎士夫纔釋褐已專心於田宅裘馬其無意於他可知異日何所藉手以節儉導上哉常避遠權貴趙秉鉉宴集廷紳邀公而公不往其骯髒自守如此於文章最愛宋曾子固皇朝歸熙甫有詩文集若干卷救荒草略讀書漫筆春

秋考例讀史平反四部皆公手編而 英陵致治考
一書蓋將極意彙括庸備芹曝之獻者纔成半稿云
配平山申氏溫和慈惠 贈淑夫人通德郎光謹女
叅判耆其祖也一男碩鏞堅苦慤實有克家行孫男
五人長淵韶餘幼公弟前縣監正觀以不佞嘗在朋
從之末猥謁幽堂之誌蓋從公久而服公淺者宐莫
如余也故不敢以耄癯辭後之君子求公學術之正
德行之懿經綸之富文章之盛者觀於此而知之矣
嗚呼今日何處得來古所謂徒步然後知車之功用
者詎不信哉銘曰

詩歌菁莪爰及飛躍思皇多士克生王國公應昌辰
瑞鳳祥麟揚庭孚號正笏垂紳優於好善樂正是似
淳夫啓沃 天顏有喜六一政事南豐文章百里牛
刀民曰龔黃叔向專對不辱君命我儀孫石闢邪衛
正陸王毛戴橫流稽天麾之談笑疏瀹眞源洋醜豕
躅憂切剝床整我行季無染我疆原始要終名實純
粹聖門四教庶無不備君子所依小人所庇公來公
去雪山輕重胡不憇遺以隆余棟報在不食垂裕遺
羸菀彼嘉陵有血佳城陵谷雖變不泐令名我辭靡
媿昭睞千齡

加平郡守李公墓誌銘 并序

吳文元先生講道澄岳山中李公敬人首先負笈受讀大學先生期許綦重公雅懷謙挹雖不以學問自名而原始要終靡一事離於道者即所云吾必謂之學者於乎懿哉公諱正夏敬人其字也系出公族英陵別子廣平大君章懿公諱璵是爲始祖世有河間東平之風至右議政忠貞公諱厚源策靖社勳完南府院君爲善類宗主三傳至諱顯祿大司憲完陵君寔公五世祖也高祖諱權中生員壯元茂朱府使贈吏曹叅判曾祖諱義行大司憲完城君祖諱明淵

文科永興府使 贈吏曹叅判號瞿圃直道事君契遇隆重而積忤權倖不能安身於朝考諱寅昌妣安東金氏僉中樞 贈吏曹叅判履禮其考也公生稟穎悟八歲從蹕路觀光 正廟特命公進前問知爲瞿圃公孫贊其舉止有度曰氣岸頗類乃祖異日必爲偉器及就傅以瞿圃公命請業于擴齋閔公公作字說期勉甲午除繕工監監役以 國葬都監別工作敘勞乙未陞義禁府都事以當直趨 命院隸促步有慢語公即移疾不出尋除掌樂院主簿轉西部令出爲三嘉縣監纔上任有殺獄難決公鉤得其情

實道伯亟稱其練達有疑獄及大事多委公審理值歲大侵公殫誠採荒先自節約勸分不施饒戶賑穀必賀他境俾貧富俱賴邑以全活兼管宜寧也道伯移隣糴于宜才數月責其完納民不堪命公曰雖一時兼任既知病民何忍坐視備陳其狀於道伯而見格公以去就爭之竟寢其半宐民碑以頌惠戊戌陞加平郡守又經荐歉民物凋弊公靡毀圯請穀于道伯又捐廩而益之用范希文浙西遺意募飢氓赴役不以斂民而邑治改觀民亦無捐瘠者有時貴過近境邑當廚傳吏以列邑供給之盛白公公曰常例不

可加竟循舊以待之其人爲之戢下且示意款洽而公終不造謝其嚴於持守者如此民有告其父爲人所殺死者按之無實列其狀于道伯不具獄告者乃索賂於讎家公嚴責之告者慚恨訐愬籌司時相驟聽而成獄竟以初不檢驗罷公職未幾本道審理被告者快伸誣枉其後持斧者希當路旨以營貨不及償勘公罪編配文義擇處陋室足不下堂劄述論語疑義名困衡錄癸卯宥還不樂城闈擬畢命于松楸齋志未就甲辰十一月二日卒距其生辛亥爲五十四歲乙巳正月扞元配坡平尹氏之藏而合窆卽廣

州宮村先兆西坐也尹淑人郡守五榮女有婦道佐
公爲善吳文元先生述其銘繼配谷山韓氏錫朋女
公切浚意下從剽腸幾殊過葬竟服毒而終可驗公
刑家之化也附公墓左兩淑人俱無音取從姪範承
爲嗣公貞介成質簡易爲心居恆色無矜持行無苟
艱雖苦勞饑乏備閱百罹而憂戚不形性於孝痛早
喪怙恃不及致養用其情於享祀必極豐潔而新物
未薦不先入口祖妣洪夫人病眼失明公代執匙箸
効誠刀圭病得以少間宗家貧甚闕享必極力供辦
先世文獻旁搜互記彙類而成快愛弟殊甚同衾聯

床至于老大殆不知爲二身而有過則規責不少饒
篤於友道而不妄交所相與者盡謹厚長者不爲無
事徵逐強言笑翕翕擴齋公胤子泰鏞卽公從母弟
也心契意合始終無間及沒經紀喪葬親自相地視
其孤如已子居家不治產業及典兩邑冰檠自勵或
勸爲他日計輒笑曰吾見熟矣恒恐蓄財多灾害隨
之也竈烟往往不起而若不知周恤窮窘如饑渴之
在躬箱篋無餘儲解紱艱食而晏如也治邑不苛察
以爲明不峻刑以立威恥銜能沽譽但推實心行實
政以故吏憚民懷廟堂至薦以善治焉公少育於外

氏外祖修谷公德厚行醇學有淵源瞿圃公躬率清
儉諷勤而禮嚴公內外孺染趨向自正已從冲藐克
修子弟職稍長從師友常兢兢乎操存踐述素多疾
弱不勝衣恒以清心寡慾爲度不近女色不喜華靡
不事戲狎不蓄玩好惟愛古今書畫而有求者畀之
無難色於文章不甚肆力又不喜著述然述則自中
尺度焉噫公識慮深遠志向高潔夙負重望咸推遠
到自以宗姓世祿眷念 王國雖處一命之微息效
一日之責必要盡分當路要津多公少時文信能俯
仰其間一第朝暮可致而公自守約不少降志豈果

於忌世哉惡不由其道得之也是以與世鑿枘不合
窮餓而沒世是有光於瞿圃公遺矩亦可以不負文
元公所期望也公弟獻夏而徵泣謂不佞曰吾兄之
遊皆九京矣知吾兄惟子在耳要得子之文用誌幽
墟不佞曰唯唯我與公有三世之好以心而不以跡
故其好彌久而彌真詎敢以癘病辭遂爲之銘銘曰
吁嗟乎敬人不失赤子之心克守處子之身才可以
贊黼黻之華而祗屈五斗仁可以躋期頤之壽而未
滿六旬憂戚厄窮身名俱湮吾欲致詰于蒼旻嗇于
厥躬者宐羸于後昆載其孔昭而詔之無垠

和順縣監朴公墓誌銘 并序
樂共子有言民生於三事之如一師之爲倫與君父等而斯義之不講久矣不有絕行特立之士爲師自靖立脚風頭標準乎斯世者師道或幾乎息矣其人謂誰故縣監朴公諱和文字道器是己公勝冠以親命從學於白雲山人山人期許綦重及山人被追削之律公至誠痛慕自和順任所解紱歸林廬終身不復起或有詛山人者公曰對弟子而毀其師可乎其嚴厲如此公胤子始愚克趾先美述公行治謁玄隧之誌謹接狀公事親篤於孝奉公効其忠非直爲師

盡分已矣則是無愧樂氏之訓辭而不負其所學者也微顯闡幽詎可已乎公高靈人以高麗大將軍之順爲鼻祖入 本朝挹翠軒諱閔以直道被甲子禍曾孫副提學諱慶業值昏朝劾弘瞻諸賊亦以直臣著名至聞慶縣監 贈司僕寺正諱蕃 贈吏曹叅議諱元瑞殷栗縣監 贈吏曹叅判諱敬鎮公之高曾祖三世也考諱謹淳負德望遭艱不勝喪妣光山金氏縣監俊材女忠貞公雲澤其祖也有女士風舉公子 元陵甲戌四月七日生稟秀異端慤稍長行已如老成及就師受小學四子近思錄諸書探討服

行壹遵軌範自髻鬣務悅親意左右服勤委曲周盡
辛卯往省外王父戴星而返柴骨鑠心頓絕方甦以
慈顏在堂勉抑從禮制除不服華盛以不克終養含
恤沒身每晨謁垂涕墓隔一舍月朔必展省到老不
廢登壠號哭用南軒松江禮養偏親志物俱備非大
事故不須與離側一念洞屬默數匙箸多寡以驗安
否中夜屢起屬耳窓外竊識氣息侍湯終歲不解帶
不交睫手執刀圭劑藥調膳日夜焦灼形貌枯悴觀
者感泣鄉里取以爲法疾革沐浴禱天血指嘗糞及
喪任情攀擗幾滅性而斂殯葬祭務盡誠力哀遑倉

卒必求合古禮三年饋奠身自幹當不任婢僕事係
慎終追遠皆纖悉詳密校心而後已道臣薦其行庚
申除 章陵叅奉時 正廟昇遐公痛 弓髯之莫
攀恨祿養之不及奉檄涕泣無意於世而恐時人以
遺逸目之阻勉就職陞義盈庫奉事 秦陵直長平
市署主簿乙丑除和順治邑端本清源未或沽術以
儒化爲先務重修縣學朔望集邑子設鄉約講經傳
擇秀士入學資薤鹽以勸其業略如明道晉城之政
賦歸行橐蕭然疏糲不繼玩心經史世間寵辱不入
於心臨終麾婦女勿近飭冠淨塵治命子孫無得擇

地以葬葬考妣兆域使得歸侍以遂願實壬申十二月二日也享年五十九癸酉窆于忠州道南山辛坐既而就同原負甲而窆從遺戒也遠近相吊曰鄉先生歿矣薦紳章甫慕其孝申狀籲 天竟蒙綽楔之典天理之在人心者不可誣矣公天資近道處恭居敬嗜欲自淺竊不易所守常以溫公所謂平生無不可對人言者自勵和氣薰人言笑油油而至義利淑慝之辨一刀兩段無俯仰循俗之意爲門戶計兼治功令七占大小解額皆不中永感後專意爲己之功沉潛闡繹尤在曾思程朱之書在 國朝篤信石潭

華陽兩贊專門禮書究極經曲爲有家章程事諸父如父叔父所居稍遠昕夕往省不以風雨廢一姊窳寡奉而同爨事之如慈母及沒庀喪祭殫誠育孤甥昏嫁及時處從父兄弟如同氣以身爲率教誨成立閨庭內外斬斬若朝典處奴僕寬莊得宜以至宗族朋友講睦悖信咸得其歡心棲遲蔭路不克少試而傷時憫俗出自真誠蹟其平生庶幾篤信好學守先善道者也公聘安東柳氏扞女治家儉勤誠以享先慈以敦族與公同年生歿先公三十二年墓附再聘宜寧南氏容五女恭敬慈惠訓子女以義方視諸男

無間已出生後公二十年歿後公十九年附葬道南山庚坐男長始愚次甯愚過房蚤夭女適申國顯柳氏出繼配有二女適金箕履魚命萬孫周命周性周性嗣甯愚公位不稱德壽不稱仁行義風節卓然可述而幾於泯沒無稱行錄紀實無一字溢辭先哲所云人須有好子孫者詎不信哉不佞夙辱公知遇不敢牢讓者所以塞後死之責也遂節刪如右以從范碑不載麥舟事而系之以銘銘曰

立我三綱君父與師所在致死是日秉彝歷選往古鮮克盡倫吁嗟朴公孝悌爲仁樞衣白雲懿茲文德鶴鳴九臯牛刀十室滄桑幻化貝錦追成翹首雲山惻惻吞聲飄然遐舉不拘形跡乃瞻衡宇乃眷松菊孰并其美和靖在昔左規右繩日乾夕惕息影養晦雪山爲重秉義自靖嬾孺咸頌煌煌丹柀瞻聆俱聳有美嗣胤克紹家學悖德流光報在不食律嶽道岡鬱鬱梓木紀善燔埴用詔無極

孝子趙公墓誌銘

并序

惟趙氏遠有代序始祖諱天赫中中朝進士樹大勳於麗朝封嘉林伯子孫仍籍焉自是蟬嫣入本朝簪組相襲至諱翊軍資監正生諱應恭黃海都事都

事公舉二男長諱璨號慎守齋薦拜洗馬不耗其次
雪江公瑗也慎守公男諱希聖蔭補軍資監參奉以
行義文學世家爲左海名閥參奉公娶全義李氏司
果令胤之女生諱復馨是爲公也公字汝芳亦性於
孝事親愛敬篤摯志物俱養出常之行卓類之事所
以感格神明如王祥黔婁者固不勝計焉參奉公善
病往往而欲公親執刀圭殫誠救護一日齋候猝劇
公出山製藥昏徑忙返忽有大虎伏路左公不少懼
諭曰情急勢迫爾雖異物不宐相梗虎乃進前低頭
高尻有若請騎然公始揣其意騰身其脊虎乃起行

其疾如飛瞬息抵家虎仍無迹進藥而瘳咸稱孝感
疾革斲指進血居憂廬墓終喪晨昏拜廟展墓哭諱
如袒括哀動鄉隣由是聲聞暢蔚爲一路所欽服舉
公實行聞于 朝特旌其閭曰孝子之門始公祖考
都事公爲閔公世卿女婿閔公居忠州邵齡喪子公
祖妣有敬姜主家之德享山南榮養之福而決意歸
寧用供滸醴慎守公奉板輿往聚外氏克順慈心終
養外翁仍家于忠後承繫衍寔爲慎守公純孝攸致
而公之至行範世可驗其所自也公事伯氏如父施
及同堂諸親務盡敦睦尤憊倦於尊祖敬宗之義居

桓自律先德行而後文藝克趾先美爲并世所欽重而與伯氏齊名互相推讓晚年構一軒于昆池上長枕大被與共湛樂嗟哦自適默契仁智之趣咸稱以趙處士曰古亦有孝友之行而甚有如趙門之二難也 顯宗乙巳十月十六日卒距其生己酉九月十五日爲五十七歲葬于忠之八峯後公山亥坐配丹陽禹氏直長克儀其考也墓附舉五男景完景遇景煥景觀景敏女適李敏溥正震正行正五正九景遇出正韓景煥出正秦景觀出曾玄以下不記公歿後屢經灰劫公私文獻蕩然無遺遺稿亦富而不傳惜

哉然徵於無徵是爲可信以其無掇拾累列也且公族孫尙書德潤氏爲著 旌閭記述世美而敘異蹟茲可以傳信亦奚以多爲哉公六代孫在熙從我遊謁隧道之文其誠悃款力疾而爲銘曰

萬善百行咸源於孝孝悌爲仁本立生道嘉林炳靈世篤行義吁嗟乎公克紹先懿執玉奉盈用全其受至誠格神孚及猛獸抱終身憂寤戀懷袖歷選孝苑讚誦爲首公謂曾子亦未有餘煌煌 旌楔表厥門閭非我思存肯恤名譽遵養時晦脫然天遊與道終始安命不憂孫曾誥誥充行門楣卽茲可驗天道報

施聊以勸善後人是貽如我不信視此銘詩

贈持平玄巖宋公墓誌銘

并序

陶庵李先生講道寒泉遠近請業之士以十百計而玄巖宋公諱熾首先服事與李公行祥成公德明并稱爲仁鄉三處士至純廟故領相金陵南公筵陳三公行誼之實特贈公司憲府持平識者謂文正之有玄巖如孔門之有子路於乎懿哉公字叔夏系出礪山累葉大顯于麗入本朝有諱軼策中廟靖國功臣至上相諱寅礪城尉號頤庵以文禮名是爲公六代祖曾祖諱熙業掌樂僉正贈左贊成壺

城君祖諱罇贈大司憲朗陵君考諱世升成均進士妣德水李氏進士喜萬女公以肅廟壬辰十一月一日生志氣充爽倫懿篤摯十歲與仲氏遊戲被踢昏倒旣而父母問所由終不對慮仲氏被訶也十七就李先生學兼治舉子業將赴會圍有以主司意勸關節公曰吾豈以一科得失爲內愧事乎又於省試忽心動徑出王父果以其前日示憊其至性感通有如此事親洞屬靡少懈於二兄克盡怡愉見衣有垢弊輒換己之新製從父兄病走馬癰公吮之卽痊親戚朋友有病痛而没人咸畏避公獨臨視喪事得

以無憾公亦無恙與成李兩公及李公仁錫李公慶章交義最篤諸公規模各不同而其不爲利奪不爲苟合不戚戚於死生窮達之際則如出一轍李公仁錫家甚貧公借其第無何李公并其庄堡斥賣公夷然曰非元爵之於吾則寧爲是耶易地則吾亦然矣李公亦曰非吾之於叔夏則寧爲是耶易地則彼亦然矣公有女李公慶章爲其子求婚公未决而李公沒公慟之曰良友休矣不可以負其生遂以女歸其子人皆義之家屢空裘褐不繼常晏如辭受必謹接人不設畦畛只是一團和氣急人之困往往不顧己

已則反是以故先生獎誦綦重以寄百里託六尺許之平居言議峻正於陰陽淑慝之辨裁之以大義不少依違至若斯文未决之案未了之事議及公輒言下剖判如一刀兩段先生之喪出於旅次蒼黃急遽之中不至失禮者公與成李兩公之力爲多間有聚訟紛然公宛轉委曲卒相釋然論者謂公處變達權而得其正焉先生嘗手書近思錄一部付公卽朱門禮書之意也是以公於先生安奉之所編輯之書無不與聞其有功於師門亦不少也公所交遊多一時名流如金公相翊李公敬玉尹公勉升莫不贊誦公

曰正直剛方以爲質淬厲增益以爲學重名行如寶
玉視財利如草芥氣義所在之死而無悔經濟所及
雖難而無碍使其施諸行事則必有大發揮於先生
之志者嗚呼其知公矣凡不遇於今者必遇於後不
合於人者必合於天然其遇與合亦何與於公哉前
配延日鄭氏圃隱先生後孫考通德郎續志祖南兵
使 贈判書德徵繼配宜寧南氏通德郎泰重女也
有女士行宗黨賢之二男一女長履中先公卒次璜
中女歸李松然卽李公慶章子側室男弼中愨中蚤
卒季幼孫文翼文徵女未行長房出季房四女一適

某人餘幼李婿男昌錫鵬錫申錫用錫弼中男女幼
公切在 正宗某年月日墓在龍仁虎多洞坐卯之
原前後配并祔直弼間公德義曠感有素公外曾孫
李學士承憲因公後孫之懇屬以幽堂之誌靡敢終
辭力疾而爲之銘銘曰

善乎成處士祭公之文曰學究王霸不屑屑於章句
事挈綱維不拘拘於邊幅捨己之量聽於至愚好善
之優發於衷曲李處士祭公之文曰侏侏乎其爲善
之勇若流水之決懇懇乎其接人之誠曾不間於踈
戚方諸前修陳豪謝拓嗚呼二公之知公者深切庶

形言之無失今於公衣履之藏敬以誦前人之述

觀湖慎公墓誌銘

并序

湖南山川雄秀風俗豪俊尚氣義重名節有若觀湖慎公乃其人也公世居靈巖轉寓羅州時逆賊尹就商之子志久謫本州陰蓄異圖交通南中名士暗相糾結公所僑密邇志居停志慕公名德屢要相見公終不往志先來訪公公只叙寒暄而止志憮然而歸書致慙懃公又火其書不答本牧夏徵與志謀逆腸肚相接亦要公相見公終不屈逮二賊伏誅南士多株連被禍而公獨超然不累見幾之明無讓於鄭雲

龍吳希吉之斥絕汝立於乎休哉公諱師典字士徽系出中國有諱修本宋開封府人仕高麗司徒左僕射謚恭獻其後貫居昌子孫世居焉至諱幾入本朝寶文提學以學問志節祭于社諱喜男兵曹參議文學清謹爲明宣兩朝名臣諱餘慶尙衣院判官贈左承旨諱誠司憲府監察有子諱光翊成均生員是生諱聖弼號敬庵卽公曾祖也祖諱憲萬考諱昌鼎妣扶安金氏錫慶其考也公生稟聰慧自幼好讀書鑽研經旨造天人性命之理泛濫諸子百家罔不該洽爲髦士所取裁焉性於孝志物俱養嘗備

甘糞質膳于市飭家人毋得低昂其價商賈感其純
誠不敢貳其價事伯氏有至愛坐同榻寢同枕晝夜
不相離及析箸取瘠土曰我以支子持此亦足人稱
慎薛包伯氏違瘍而切公躬執刀圭殮殮家人勸出
避公曰死生有命豈忍避兄竟無恙人又比度哀日
用常行制節謹度冠昏喪祭壹遵朱子家禮手書古
婦人淑德懿行成教閨庭訓子姪御奴僕咸盡義方
自經乙亥迎變悲憤感慨彌懷隱求冬至思鄉詩云
天時冉冉日相催靜裏潛聽地底雷客留錦里三更
雪春入滎江一樹梅甘苦經來思蔗味炎涼閱盡感

葭灰他時若遇昇平歲收拾殘書及早迴嘉遯之意
見於剝復消長之幾者如此晚益斂約沉潛名理宰
南邑者多款衡扉門外蹄輪殆相錯尤慎交遊不妄
迎接晚愛江湖之勝彈琴賦詩存心真樂一路稱觀
湖處士 正宗庚申正月十六日卒于冠山寓第去
其生壬寅二月十七日爲七十九歲辛未十二月返
葬于靈巖永保里亥坐配全州李氏徵麟女夙服家
訓有女士風生後公七歲歿後公十一歲附公墓左
舉四男四女男廷顯重顯大顯玉顯女適丁志學文
致福李興運李在仁重顯男在箕生景鎮轍鎮大顯

男在夏爲世父后生必鎮洛鎮弘鎮毅鎮在殷生達
鎮在周生宇鎮斗鎮恒鎮玉顯男在哲生聖鎮在浩
生休鎮寬鎮內外曾玄不盡記公天資高潔持守貞
確本之孝悌濟以學問鄉鄰服其義朋友慕其信當
求諸高士傳中豈并時流輩攸及哉或有以晦身草
萊各湮滅而不稱爲恨而公遺世獨立淡乎塵埃之
外真所謂影響昧昧惟恐聞於人者也旣不慕當世
之榮又何心于後世之名哉在夏從我遊累謁公幽
堂之誌余老閱鉛槧久矣竊感公高世之操辨姦之
明力疾而爲銘銘曰

嗟嗟若士綱紀南垠渾金璞玉彌葆其真先見之明
其知如神早已洞晰忠逆之分形神超越用自存身
本之則存蹈義踐仁孝友爲政餘力學文庶幾無愧
明理知言原始要終允矣儒珍巖巖月岳幽幽玄電
英魄不泯從以碩媛昭揭雙美用詔千春

孺人晉州姜氏墓誌銘

并序○乙未

坦園尹明直過余江漢之上示其內子姜孺人所著
靜一堂遺稿要一言發其潛幽余曰婦人之德含章
而不外見且竊讀其狀仁義忠信不離於心欲以文
辭圖不朽者恐非孺人素志曰無已則盍爲誌用壽

厥傳余曰是不可以已也遂接而敘之孺人晉州人以高句麗兵馬元帥以式爲鼻祖奕世圭組名德輩出爲左海名族不須譜也考諱在洙妣安東權氏處士瑞應女寒水先生從玄孫也權孺人有異夢而舉孺人因夢而名性貞靜端一足不踏閩外處士公奇愛曰山水軒從兄嘗稱汝母爲吾宗第一婦女汝其趾矣仍受女誠罔或小違及嫁舅宜其言行曰吾家其復興乎事尊章至孝定省必拜及喪哀毀幾不全時值荐飢家罄銖粒而竭力終事體膚皸瘃而不知勞致敬君子出行必拜勸其居業曰人而不學無以

爲人與其棄義而營生不若間道而安貧妾雖不才粗解針績當謀饘粥願讀聖賢書無以家務累心明直感其言讀四子及程朱書孺人每手執刀尺隅坐而聽遂卽闇誦默契奧旨復勉明直從師曰學而不行與不學同真知經訓之當然後可行獨學則固陋願從師友以自廣俾盡生三事一之義明直家益落不奠厥居僑寓窮山虎豹縱橫累日絕火又罹傷賊而孺人猶寬明直曰守正邪自遠天脩短自有定命饑困尤當忍性患未盡在我夫何怨尤明直有過失必申警不休雖在外堂出片幅止之有憫明直之貧

操千金干囑者孺人勸其勿受曰詎可以千金而易
吾之操明直亦嘗喪財孺人曰得失關數毋少介懷
明直赤手舉三世緇囊爲親族繼絕者近十人且營
辦昏喪而咸賴孺人之力明直好賓客戶屢常滿孺
人極意供歡人謂其能孺人曰是婦道之疎節而猶
不能則焉用婦人爲哉常云貧富自有定分寒士之
妻厭貧而至於訕泣非人道也苟其非義死且不可
受况不必死而可以貨取乎善者治之源利者亂之
樞以故遇物先求義之當否苟有以利來者守正以
遠之居恆無疾言遽色呵叱不及僕隸晝不窺戶夜

不下堂臨財先人而後已分飪先死而後生善則歸
人不善則歸已慥慥乎隱惡揚善曰不治已過而先
言人過可乎有毀明直者勸其加厚曰盡已而已嘗
云天命之性初無男女之殊婦人不以姓氏自期者
是自棄也專於內修動靜如一常服祿衣隨明直晨
謁家廟退必端拱危坐體認未發境界神氣和平不
知有饑寒疾病每聽晨夕鍾聲默驗心體存否如朱
先生同安時書童擊水杓爲戲孺人令均其節以驗
操舍之頃又紉針期以從此至彼不易此心竟賴存
養之力始患浮揚漸底凝定焉好學如渴遍讀十三

經沉潛闡繹窮晝夜罔倦博通典籍古今治亂人物
臧否燦然若指掌嘗云五倫五常之理也皆人心所
自然非強勉又曰身為萬事之本敬為一身之主敬
身一篇是小學總會又曰學莫先於格致今人不能
修齊由不能用工於格致又曰性命之微一貫之妙
無徒作一場空說先從人事上求之又曰天命之性
卽子思極言道之本源又舉戒懼俾學者先知下手
處非懸空說了又曰天地萬物與我一體苟非格一
物之理則欠吾一知自三才萬象以至經史百家日
用所疑罔不鑽研錄為三編多精義名論竟佚不傳

惜哉筆法一出心畫嘗不作閒言語或為君子代斷
或為箴戒發者偶被人見賞自是彌加韜晦以訥其
出焉及疾革無怛化意見明直泣正色曰死生命也
何憾之有願夫子勉旃竟以壬辰九月十四日卒距
其生甲子一周也隣里如喪親戚明直學徒升堂而
拜者皆素帶號哭十月葬于廣州遁退里壬坐從先
兆也明直各光演坡平人世襲文行服事鰥村宋公
固窮勉學而得於內助者為多云孺人九舉不膏為
之畜妾視遇如子女而曰妒之為惡當居七去之首
繼子欽圭欽圭子九鎮嗚呼古先王施教初無男女

之別而女子不就傳詩之所誠只在無非無儀維酒
食是議以故簪珥中雖有英姿朗識未嘗以道學自
勗苟有一言可採聖人不棄此衛莊姜許穆夫人之
詩所以見列於國風也詩猶不刪况專於學而窮天
人性命之原者哉今讀孺人文其敦學問裨世程者
近古閨閣中一人非特婦人之能言者也余謂明直
孺人君之師也君更讀十年書可以知孺人之德明
直笑曰子之言是也靜一非孺人所自號而乃所願
在茲云銘曰

猗嗟碩媛名闕肖子維德之符具茲四美敦悅詩禮

循蹈繩軌動靜無違行已有恥環珮瓊琚翼翼靡靡
象服是宜不徒簪珥好學善道是安素履天授慧識
洞窮衆理鷄鳴昧朝以勗夫子寤寐羹墻卽古莘摯
弗篤弗措死而後已清溪漣漪遁山剡寢永安且固
以藏女士德音孔嘉昭示無止我銘不朽敬告彤史

淑人驪興閔氏墓誌銘

并序 ○戊戌

申氏望東陽者爲左海世胄至文貞公諱欽文肅公
諱景德業名節焯然耀世文肅有曾孫諱景翰玄孫
諱愷父子居內艱俱不勝喪而卒是爲前清州牧使
常顯寧世之祖禰也寧世配淑人閔氏居姑憂過毀

既葬而歿禮云婦事舅姑如事父母而未有死於孝如淑人者也申氏以孝世家至淑人而又不勝嚶嗚呼其盛矣哉夫孝者天性而能盡其分者善矣毀不起疾非敢曰不傷於孝而卽可以見孝之真傳三代一揆則孰謂不係世類哉淑人系出驪興以文忠公諱鼎重文孝公諱鎮長爲祖不須譜也考諱景熾繕工監監役監役公娶清州韓氏進士師沁女舉淑人年十九爲申氏婦事尊嫜愛敬篤摯時祖姑南夫人年高癯淹淑人侍處扶將晨夕洞屬夫人常稱以孝婦南夫人窈窕纒畢而尊舅捐世舉家遘癘君子又

方殆淑人初起死病獨當大故赤手辦具卒得就事聞者嘖舌曰非人力也誠孝感天天相之矣苟非然者幹局男子之所不能而能之乎尊姑傷念計活未忍遽委以中饋淑人委曲承佐爲之代幹俾忘其勞焉尊姑素善病遇寒輒劇臥起痛楚輒委淑人之身而得少定冬夜嚴夏衣不暫解風爐冰竈爨必躬執不食而不知餒顛踣而不自恤設鼎鑪自具甘旨數匙多少以爲憂喜如是者四十年如一日至養以專城而猶不變及喪尊姑晝夜哭不絕聲氣暴陷幾危者數而猶強疾益祭奠至不能成音掩抑啜泣血淚

如傾以致病欲諄諄譖嚙罔非奉養饋食之事是可
見至性也以丙申五月十日亥時卒距其生壬辰八
月十六日享年六十五七月丁酉葬于揚州下道面
雞田里亥坐申氏世葬利川而無所於附故新卜也
一男應朝進士二女適沈樂澈李喬信沈婿子女并
幼淑人自幼婉柔惟親志是順移事舅姑者如此推
諸生養而致嚴於追遠在邑當祭必自備具而割烹
亦親聞芻郡或委官廚歎曰寧不祭耳神其享諸多
產少育愛子女甚而或訾衣食則切責曰詩禮家子
弟而重口體將做甚事憂惋良久憐二女居貧而不

資以私曰非直難繼也一再資給而止恐棄前功而
傷恩素性恬儉不喜紛華隨君子六邑宐有以不期
侈者而布素澹泊如平昔曰豈不知華美之爲好但
非清寒本色且侈心一肆不可紀極御婢僕不施箠
楚君子病其太寬則曰安能使人盡如吾意少忍自
無事藉曰當治而不治何害之有君子性貞介不諧
俗及降志祿仕淑人不喜菽水之無憂而憂門戶之
不振也君子爲邑端本正始化理休洽少欠適志輒
棄之如弊屣卽其所自致甚盛而內助之力與多焉
及歸靡所顧戀亦無一文尺帛私儲君子嘗畀錢百

縉曰善爲藏幸以待吾不時之需暮而索之淑人出
諸藏中蛛網滿貫是皆婦人所難能也淑人積行累
仁其德備矣不可以徧書惟其殉於孝者先立其大
克纘先烈是所謂秉自然之質有企及之義而及其
成美則一也婦人之行含章而不見然不佞與寧世
有三世之好通家誼敦稔服闋則寧世用梅宛陵古
義述其行謁銘于不佞寧世非苟譽人者其言宜可
信也淑人至行範俗原始要終無以加焉則不徒如
宛陵夫人性識明知道理而已縱欠六一翁筆力亦
何忍不銘銘曰

萬善百行咸原於孝孝亦多術誠爲其要猶歟淑人
純一婦道夙夜劬心忘身之老老益匪懈奄邁不造
孺泣難繼不自全保如古孝子風吹卽倒毀不滅性
雖聖攸詔孰與忘哀安心錦稻詎但自盡先軌是紹
是爲全歸有光祖考煌煌彤管厥聲彌劬于後遺羸
胤子賢肖理宜克昌必食其報我薦石章用裨世教

贈貞夫人安東金氏墓誌銘

并序 ○乙巳

吾先師近齋朴先生配曰 贈貞夫人安東金氏右
議政文忠公諱尙容之五代孫也高祖諱光炫吏曹
叅判曾祖諱壽民德山縣監以孝 旌閭祖諱盛道

殷栗縣監兩世俱 贈吏曹參判考處士諱時筦有
博學高行娶南陽洪氏 贈吏曹參判諱泰猷之女
益平尉得箕其曾祖也夫人生於忠孝之門又孺染
賢父母之教自齟齬持躬中度處士公稱之曰使汝
爲男子當不墜家聲稍長習小學女誠言動以禮最
被季父文忠公所深愛十五歲歸于先生祖舅姑舅
姑喜曰是法家女也族黨咸賀得眞冢婦祖姑李恭
人素稱女士愛孺人德性相近提前言往行以詔之
夫人聽受惟謹終身不忘侍祖姑疾當暑月扇枕席
竟日不離側粵姑俞淑人疾革夫人斫指進血及喪

家益窮夫人嗣蒞中饋雖鬻鬻截髮不闕朝晡之奠
粇粇年老艱食夫人竭力奉養必有酒食煑粥煖羹
不使人攝哭喪欲絕祥之日通夕號泣收藏父母舅
姑遺札時時敬閱用寓追慕事君子敬以盡禮入門
久猶如新婦然燕私之談皆中規箴常勸君子爲學
曰人有美質而不學如玉不琢見世路險巇勉君子
廢舉先生好學謝公車夫人喜云願夫子之有令名
不願有利祿也於物泊然無所好獨悅義理之說先
生時語及經禮微奧歷代各臣事跡 國朝士禍顛
末夫人靡不通習最慕名節每論成仁取義處必感

概激昂曰大丈夫行事當方嚴正直不可無模稜文
忠公抗疏竄海島夫人曰老年投荒雖爲子姪憂在
自家則光華矣其見識卓越又如此先生妹金氏婦
病腫而斃夫人手自洗膿塗藥滌除不潔而無厭倦
色先生弟忠獻公旣析箸夫人分其甘煖待介婦和
平無底蓋方圓夫庶母同居十數年亦不失其心推
及于姻族鄉黨壹以誠信遠近無不感頌以君子交
遊之賢否爲憂喜常恐一事之累君子遇飲食不輕
進必審其所自出曰吾聞夫高祖承旨公在闕遇富
宦綺饌衆成就食而公獨不顧非但夫子性潔吾欲

其無忝先德也常稱其外祖耐齋公遭家難自處如
窮人聞禍家後人有尙華侈則潑非之自以仙源公
之後其曆日必書 崇禎年號人謂春秋大義在女
史中焉外曾祖母淑安公主有愛 賜內訓夫人每
讀其耳無塗聽目無邪視專心正色之語三復致意
從姑母宋公堯和夫人著自警編夫人尊閣誦習其
磨礱浸灌者如此故能成其德非獨天性然也家承
累世宗祗夫人爲主婦盡誠拮据無有關乏漑濯烹
飪務極潔蠲供賓客物芳器淨裁割盛齊必要方正
雖常饌亦必務精御臧獲均其賜予不偏勞逸教之

不從則施罰晚舉胤子亦不以慈愛而奪其教胤子
爲洪孺人所鍾愛孺人既歿夫人撻子而泣曰昔撻
汝吾母憐汝責我今撻汝不聞吾母言是以泣耳憂
人困窮若在己思必救濟側隱及物將祭婢買生雉
夫人不忍見其殺乃買用死者而放其生嘗養雞羣
雞愛而相哺家人異之以爲夫人仁德所感云夫人
素善病以辛丑三月十六日卒去其生甲寅爲四十
八歲夫人嘗論婦女喪臯復用男僕非禮也至是以
婢復從治命也五月祔葬于揚州祝石嶺先兆男宗
輿瑞興府使府使男雲壽順興府使府使男齊近生

員女適金元性夫人居恒坐必端拱簡言語飭威儀
切戒其聲色疾遽偶有差失則輒錄以自省口不出
戲謔心不萌枝克不逾詐以爲智不枉道以沽譽不
動俗忌不惑鬼妖其辨事是非當否動準繩尺性又
高潔未或有苟且求假雅不喜華靡服弊衣裳而不
恥盡精於女工禮服制度多所通曉治家務節縮財
費經紀用度至於箕臼位置亦皆秩然有常先生平
居不問產業夫人自織組取直以養君子所處有至
不堪者而亦委分任命無怨尤意於古賢婦人願學
俟夫人及呂榮公夫人焉先生諱胤源道學經術爲

世儒宗秉義自靖屢拜官不就 特贈大司憲祭酒
夫人從 贈焉先生盛德大業自其天成而造就之
功得於內助者爲多於乎休哉先生嘗云夫人與我
臭味相契有偕隱林樊之約而不遂以爲終身恨焉
直弼旣述先生幽堂之誌齊近又請夫人誌分不敢
當而義不敢辭遂爲之銘曰

猗歟碩人篤生名門百行咸備惟孝爲源四德俱茂
本之以誠鷄鳴昧朝警戒相成組織有訓環佩有聲
譬如乾坤體用動靜旣翕且闢德以之廣窈窕沼沚
蘋藻芳潔沃盥饋食敬身自律何以致之誦法詩禮

姆教婦式服自冲歲積仁潔行爲君子配氣味攸同
至德相濟胡靳遐齡而卒未究二南承化不繫殀壽
遺芳永世允矣女士夫子狀德詎比彤史歸于同穴
百歲之後宰如之安公藏在右我述樞彝并垂不朽

烈婦宋氏墓誌銘 并序○庚戌

當寧元年庚戌 命旌寶城士人朴重洪妻孺人礪
山宋氏之間曰烈女之門始重洪憤村民崔在臣詬
辱士夫縛其手警飭踰月在臣得寒疾死其親屬生
鬻尸嫁禍之計嘯聚賊黨乘夜撞破內室重洪先被
凶鋒頭碎血淋漓孺人冒死捍衛四面受敵臂折脅

拉流血遍體竟脫夫子於劒鏃顧謂夫子曰士族婦女被毆凶漢義當捨生而丈夫慎重之身豈可放兒女子溝瀆之諒乎隱忍保重終雪此憤又見羣賊突入內寢置凶人尸體號泣曰從容之義已淩於心仍自裁於廟門即丙午十一月八日也距其生已卯十一月四日爲二十八歲一鄉章甫訴于官營邑盤敷凶賊輸款數月而後孺人始殯殮蠅蚋不近虫蛆不出顏貌皎然如生堅如鐵石冤氣之所蟠結也孺人前室子懿鉉援春秋不復讎則不書葬之義晝夜泣血百舍重繭顛冤 蹕路者至于再斯大司寇金公

箕晚勸凶賊以償命之律請孺人 旌閭回啓蒙

允其所以標萬古之貞烈雪九原之深冤者更無餘憾而懿鉉以童蒙爲母復讎者可謂有是母有是子也孺人先祖忠剛公諱侃爲 莊陵忠臣累傳至倡義將 贈叅議諱大立與李忠武公討倭賊殉節露梁 贈承旨子諱謙以洪原縣監丙子倡義死亂兩世俱被 旌忠考諱鎮諱妣金海金氏昌溫其考也重洪珍原人考諱在煥祖龜相曾祖生員守天而文康公光前其九世祖也孺人生稟絕異朗慧成性纔笄盡通女則羣書手抄唐虞以來賢婦人事蹟各以

孝烈實行錄藏之巾衍每夜澹張燈溫繹恆以古女
士自期曰臨患難而當如竇氏女陳家婦則幸矣父
歿母老而家益落勤紡績供甘旨母病禱天達曙及
遭艱攀擗哭踊絕而復甦長侍柩傍毀瘠幾滅性及
嫁孝養尊舅靡極不至晨夕與婢子把燭詣舅寢門
外省其安否不以寒暑而廢事夫子敬處妯娌順愛
前室子有逾己出推及臧獲亦曲盡恩義夫子爲先
事留洛數十年計活剝落而不少介意常勉君子以
保攝身命褒榮先世或有語及生事輒云君子不違
啓處妻孥安敢望飽煖及文康公節惠誕宣孺人迎

慰曰君子多年旅食克成先世未遑之典可以藉手
而歸拜也蓋宋氏世篤忠義朴氏亦以詩禮傳家俱
爲湖南名閥孺人胚胎前光又歸法拂宜其受天之
祐吉無不利而變故罔極竟以身殉天道報施其何
如哉嗚呼食人之祿而有死無貳者謂之忠臣處人
之室而有死無貳者謂之節婦若孺人者值禍亂祇
知有夫子不知有其身回夫子於萬死視己身如一
芥往者云慷慨殺身易從容取義難孺人兼此兩者
於乎懿哉方其誣案未勘劄鋒未斂孺人先期警夢
若是者三苟非至誠孚格曷能符合如神哉從古貞

女烈婦成仁取義者何限而未聞發諸宵寐審幾應
變乃爾也重洪從余遊服孺人節義甚熱恨無劉子
政筆力用能幽顯闡微圖不朽於永遠重洪謁文用
誌幽阡未忍以瘡病辭銘曰

有若哲媛內自含章美在其中養德閨房夫亾守貞
婦道之常遭罹奇禍夫存身亡莽蜂辛螫矢集內牆
不競不絀惟義之將精靈攸感 天日回光拔諸坎
窞用奠康莊是夫是婦是兒是孀宜 旌於國宐表
於鄉身頭赤腳垂耀煌煌永樹風聲用扶天綱世無
彤管疇克闡揚納銘幽隧百世允臧

烈婦孺人金氏墓誌銘

并序

崇禎四甲申二月楊州趙公秉愚卒孺人金氏以鹿
車未挽遽失所天後五月下從而泯其迹君子曰慷
慨殺身易從容就義難孺人以婦人之身行丈夫之
所難可謂賢也已於是 憲廟亟循多士之請 特
施綽楔之典世之爲烈者勸焉所後子龍熙袖是狀
訪余江漢之上血泣而言曰先妣之烈著矣無事於
志然淵丘變遷不可以不備願有述焉余拜受嚶咽
不忍書亦不忍不書也金氏籍光州以文元公沙溪
先生爲先祖不須譜也郡守諱相龜生員諱箕章縣

令諱在熊會祖祖考也妣韓山李氏牧使羲淵女
純廟乙丑七月二十一日生于連山林里第生有異
質慈順溫良自幼持躬端嚴事親無違拂遭外憂服
喪甚哀事母若祖母愈孝每祖母有疾晝夜侍側累
日不懈未嘗交睫解帶嫺於女紅略通小學女戒諺
書筆畫勁正雖倉卒無潦草制除趙公妾禽行醮卽
有疾問醫上京師疾愈革不筮日于歸及至而公切
既奔喪謂不識公面願一憑尸見之仍決意下從成
服叔父判官公率歸其第飲食居處周防甚密孺人
謂其姊曰兄以我爲死耶吾不爲是也舅將作公令

歸林里以自保時公柩歸藍浦之三溪孺人曰願隨
柩而下襄訖歸寧未晚也將作公親率而去周防亦
益密孺人無幾微見於辭色尊章命之食不敢違餘
人雖強之不聽也事舅必先意承奉朝夕饋奠哭泣
不絕舅至則止未嘗見憾容命勿叅饋奠便從之嘗
謂其從姪曰吾未嘗有毫分傷人害物之心亦未嘗
以惡言加諸人於婢僕亦然孰謂今日薄命乃爾囚
首墨面每坐一處終日伏哭哭訖復坐目不轉睛身
不移動每日居處進止不失尺寸視之若木偶人見
人如措躬無地雖婢使不擡眼視故孺人在舅家數

月而婢使有不得詳其面者律已彌嚴每人慰解或
雜以詼謔亦不啓齒尊者有問應對惟敬對婦奴亦
溫順看閱小學五倫行實及卒哭勉使歸寧孺人請
俟秋蓋欲得正而斃也伯叔府使公見孺人形色大
痿譬之曰勉自全保以慰兩家老親孺人感泣強從
凡飲食言語頗異前日家人稍信之孺人使婢從容
告尊章乞吸草尊章憐而許之孺人密以草浸之水
飲之又以他藥加焉已而疾作嘔泄若暑瘡刀圭罔
功口渴呼漿水使飲鹽湯却之曰素所不能服也進
米泔水却之進蜜薑茶曰吾素病蛔飲蜜不利又卻

之蓋益能哇惡泔能解毒而蜜能和中也家人按草
缸及藥裏得其跡而孺人已不可救矣聞者皆釀涕
時六月二十三日也得年二十府使公以第三子龍
熙爲嗣服喪三年扞鴻山縣西笠店爰坐夫子之墓
而附焉嗚呼大易言婦人貞吉但曰從一而終耳除
非如令女所遭者固不必以死爲貴也然則近世士
夫家孀婦父母俱存兄弟無故舅姑爲之寬譬姊姒
爲之扶持家事有託依歸有所而果於自裁者若驟
觀則詎非所謂可以無死死者乎然其所以以下從而
不恤者蓋出於深識遠慮非知者不能領會也嗚呼

古昔遺烈出於傳記者或毀髮膚之體或作溝瀆之
諒雖操存而身亾行立而形虧雍容整暇用克殉身
如孺人者鮮矣公議攸發 旌褒焜耀幽明無憾而
亦非孺人以義處命之志也孺人大節卓犖卽所云
動與禮游靜與義立則孝友敦睦之行端莊靜一之
德巨細隱顯出於家狀遺事之間者論亦可不論亦
可也於是畧撮其烈行梗槩如右系之以銘銘曰
鴻山之西笠店之原伊誰云藏展彼若媛生稟至性
孝友貞淑身服詩禮志厲冰玉瑩瑩方寸民彝物則
哀哉崩城未挽我鹿我鹿旣挽淒涼窳窳我生弗辰

耿耿晝燭行無片玷志固匪石未見君子穹壤罔極
九冥旣果言泯其迹烈哉孺人孰領深識死卽同穴
永世允臧髦士攸誦緙楔煌煌煌煌輝輝不顯不彰
孝子食報垂裕無疆我替彤管載述銘章一片塲砂
昭示茫茫

淑人慶州金氏墓誌銘 并序

吾先師近齋朴先生有贊予婦曰淑人金氏金氏系
出新羅麗初太子太師諱仁瑄勳德俱著爲世名臣
九傳至觀察使桑村諱自粹見麗季政亂遜于嶺南
以孝旌閭 本朝受命累徵不起六傳至兵使諱九

淵通解易學屢登 經筵是生府尹 贈吏曹判書
諱軼又三傳至諱鼎禹有至行 贈大司憲大憲生
同中樞諱漫淑人四世以上也曾祖諱夢說通德郎
祖諱養德考諱魯範兩世以行義相承妣孺人昌原
黃氏尚齷女 英宗庚寅舉淑人于豐德寓舍自幼
端莊明惠孝弟天植稍長動作中禮女紅精敏姑母
尹氏婦鍾愛爲之率育十八歸朴氏爲府使公諱宗
輿繼室府使公親老家貧且奉屢世祠版淑人拜舅
禮畢卽主內政制壺有法度承祭盡誠禮籩豆孔修
庶羞蠲潔事先生極其愛敬典衣鬻飾而供具罔缺

先生晚年善病殫力服勤祁寒暑雨夜以繼日而無
倦色先生性簡嚴日用事爲咸有繩尺侍者難於奉
承淑人獨能順適其意先生曰是善事我足忘老鰥
之苦也事夫子容儀必整言語必徐凡諸施爲雖小
必稟過失相規順而無隱府使公天資絕異攜染庭
訓學就德立若無待於內助然潛運默贊裨益弘多
先生有側室待之以禮同居數十年不失歡洽愛好
妯娌無異同氣宗黨隣里皆接之以誠信供賓客器
皿飲食皆潔淨整齊聞人家作邪味者曰珍奇相尙
其能久乎御臧獲愛威得宜勞佚必均有罪喻以事

理不悛而後施罰教子必義方孫生員齊近在署
亦以飭躬力學諄諄告教曰丈夫蔑識是謂齋面何
以理家何以事國且汝家詩禮相傳後來期望在汝
一身其欽念哉急難若在已恤窮如不及施予不計
親疏必曰彼惟我是恃寧忍落莫凡事與其薄也寧
失之厚聞者感服比失怙恃以未克終孝爲沒身慟
尹姑歿悲哀過常有一弟嫁京師頻問訊以展親告
病則憂至卻食收藏父母舅姑遺札時時敬閱用寓
終身之慕府使公卒於瑞興任所胤子年纔勝冠而
傷無親懿淑人節哀慎終勿之有悔胤子蚤從蔭塗

亦官府使養以專城淑人年八十 憲宗己酉二月
二十有六日卒附葬于府使公墓左在楊州蘆原烽
火峴丑坐男卽雲壽孫男卽齊近女蚤夭孫女適進
士金元性曾孫男幼淑人聰明強記如聖賢言行歷
代興廢一經於耳終身不忘兒孫過庭召之前娓娓
提耳平居正容端臨沉默寡言而方寸通爽尤以克
己爲工戲侮不出於口伎克不萌於心不逆詐以爲
智不修飾以要譽不惑於巫卜不動於俗忌接人誠
款甚摯雖卑賤無忽也見善必揚見惡必隱忠以存
心恕以及物見饑者欲哺寒者欲衣鷄狗之微見其

生不忍食其肉不喜芬華衣弊不恥視世之婦女高
髻美飾粲粲衣服若將浼焉時新之物非薦不入口
魚果佳品有所得必儲爲祭用處貧窶若固有之菜
糝不充晏如也府使公晚歷州府餼廩豐饒而升米
斤肉不敢擅用食不兼珍衣不御錦所用什物不過
短檠弊箱及罌甕之屬嘗曰舅家以清白相承今蒙
國恩得免於飢餓幸矣夫何求哉在衙有干囑者却
之嚴不預外事曰恐累夫子清德也及其子繼典州
邑遇人必問政治得失以爲憂喜生員君屢赴日次
殿講淑人不樂曰士之持身當如處子今登 筵應

講舌爭不得覩然而退孰若不起之爲快也且有文
不第從古甚多盖有命存焉若其勤學攻苦乃分之
宜豈徒爲科舉已哉其識見之明言論之正得諸天
分者類此直弼嘗出入先生門下痛癢相關夙識相
範不下於晦翁之於慶國夫人也生員君以家狀一
道見示謁幽堂之文詎敢以癘病辭况其規矩準繩
之行貞靜幽閒之德雖古哲媛殆無以遠過是宜編
之彤史垂法後世以見先生道明德盛不出家而成
教者其效如此則其義尤不容辭遂接狀爲敘繼之
以銘銘曰

抑抑近翁爲世儒真不見成德淵潛自珍維道乃亨
室家式刑孝子不匱淑人如玉溫恭朝夕其儀不忒
死喪孔威有震且業淑人中饋鼎不覆餗克孝克友
克嫻克睦百行孔備閨庭穆穆舅曰善事士曰其宏
隣比不間神人俱依相古哲媛展矣匹休松栢丸丸
烽峴之邱元配卽同君子是果有來樵牧毋剪毋藉
女士有行可續風雅

梅山先生文集卷之四十三

梅山先生文集卷之四十四

墓誌銘

曾祖考縣令 贈左贊成府君墓誌

漣川縣南十里清華山下仁聖洞坐坎之原卽我曾
祖考三登縣令 贈左贊成府君衣履之藏也先考
嘗詔不肖曰苟使世無可以不朽人者無寧子孫自
作之汝庸識哉不肖謹述先考遺意而爲之誌曰公
諱尚彥字君美吾洪出自中國唐宣宗遣八學士教
國人洪氏居其一始籍南陽至諱殷悅爲高麗佐命
太師曾孫諱復禮史五傳至諱由道密直司事與李

益齋諸贊同錄燕邱隨從功再傳至諱溟入 本朝
首除漢城判尹理京兆生諱師錫材兼將相受 太
宗顧命諡莊襄又再傳至諱以平用文學致重名與
鄭希菴諸公托金蘭契成均館司成生諱德潤 宗
廟署令兩世俱 贈吏曹判書生諱仁恕戶曹判書
扈 駕龍灣而卒遺命辭錄勳是爲公五世祖也高
祖諱邁洪州牧使曾祖諱汝龜丙丁後沒身自靖世
稱 大明處士舉四男長諱泰元殉孝 旌閭次諱
泰亨生員生員公長子諱重採繼伯父后 贈司僕
寺正兩世文行爲士林所稱述皆踰弱冠而歿卽公

祖禰也妣全州李氏通德郎德齡女孝寧大君補其
先祖也公以 肅宗十九年辛巳十二月十日生于
崇教坊舊第生稟俊偉孝悌天植纔三歲喪皇考能
自刻勵治文詞出遊場屋聲望藹蔚乙卯發生進兩
解中生員試丁卯除 昌陵叅奉撰 英陵叅奉轉
濟用監奉事 宗廟署直長換司藁寺直長陞司憲
府監察壬申拜三登縣令邑有樓觀山水之勝朱墨
有暇觴詠嘯舒超然有吏隱之趣爲政平易不要聲
譽而遺愛在民久猶不忘三年賦歸行李如洗壬午
拜敦寧府判官癸未八月二十二日卒于椒泉第正

寢壽六十三 惠嬪宮及 世孫宮 嬪宮別致賻
嬪宮又下錦緞用賁贈穉隱卒之典無遺憾焉十月
十七日葬于仁聖洞隔玄溪先塋一岡也公器量宏
厚寬縮成性休休之容溢於言辭恢恢之度見於動
止處心絕戒伎克制事靡所固必蚤失嚴天含恤終
身喪餘號辯如袒括事偏親盡誠左右怡愉務盡其
歡菽水不給而滫瀡無闕李孺人以女婿家貧罄財
產供給而公先意承順未見絲髮有違先壠遠在窮
峽而四時節享必躬往將事必留連內舍瞻依松楸
用寓蓼莪之慕及得邑以祿不逮養祭羞豐腆以代

專城之奉事兩姊如嚴兄同侍偏親湛樂融泄與共
日用無彼此相形奉季父同宮年少於公而敬愛俱
摯閨梱之內相敬如賓坐席差遠衣袵不相接敦睦
親戚曲盡其道昏喪必助以成禮團會宗黨輒呼酒
唱酬敘盡情話風流溢發四座款洽公孩嬰當室傳
家世業被支庶分析蕩然無遺者而及長無幾微色
幼而長音外氏事諸舅如父兄與姊婿情愛相孚有
逾骨肉教育諸甥無間已出是皆孝之推也鍾愛獨
子而施教嚴峻不假以色辭接人不設畦畛親姻宦
達而未或干及好施與有窳不能養親者撤饗殮以

周其急所居狹陋而處之油然淨掃一室纖塵不留
竟日端坐靡所營爲冲恬淵湛敦懿山靜親昵者不
敢相狎踈遠者獲盡其情和嚴交濟者如此自戚聯
椒掖謙約畏慎與入過從操守牢確不通關節見
趨走勢利者若將唾罵御奴僕不施楚撻而自致畏
服世傳臧獲散在諸處生育蕃衍而亦不收貢盡焚
其文券知府君者罔不詡以大度筆慕鍾王一出心
畫雖赫蹄寸札未嘗潦率配順天金氏通德郎載重
之女左議政平陽府院君承憲其先祖也事尊章以
孝承夫子以敬教子孫以禮率婢僕以恩仁愛忠厚

閨閣中所罕有君子頌之曰女士丙申二月十八日
卒于胤子禮安縣任所距其生癸未爲七十四歲祔
葬府君墓同麓異室舉一男二女男善養黃州牧使
贈吏曹參判女適府使李塲清原府院君金時默庶
女適李信秀參判有三男三女男履簡同敦寧 贈
吏曹判書卽我先君也鼎簡縣監濟簡通德郎女適
金載象進士沈能基完城君熾府使女閔升顯清原
府院君女卽 孝懿王后也李信秀系子命愚判書
一子二女子不肖直騁猥蒙 旌招位躋上卿不敢
起女懸監金泰根尹約烈有庶子女若弼前主簿李

敬愚武科縣監子翼弼縣令庶子奭弼營將通德郎
子允弼金載象子鏞鏐女叅判鄭漪申錫久閔升顯
子致永致秉郡守致徹直弼系子一純前縣令女閔
慶鎬進士嗚呼府君值家蠱變喪禍荐酷煢然一身
俾家再造固窮安分老而彌嚴以義處命不苟合於
當世詩所云淑人君子懷允不忘者也蓋自處士公
潛德幽光積累既久而無年位以表顯碩果之報宜
在府君而既厄公車又靳遐齡志業未究位德不稱
爲後昆無涯之痛而猗歟我 聖后篤生於宅相母
臨一國丕闡陰教斯乃府君積德餘慶天道報施其

在斯乎 純廟己巳八月 命贈府君崇政大夫議
政府左贊成兼銜如例金淑人從 贈貞敬夫人
遺承旨侑祭錄用嗣孫卽因 慶會順 慈衷之
聖意於乎盛哉不肖竊觀往哲及近世名賢多自述
祖先隧道之文祇述其行治踐歷而不爲銘銘者贊
頌之辭非子孫所敢私也故己焉於是謹效其例而
爲之誌納于壤中用備淵丘之變易云

祖考牧使 贈吏曹叅判府君墓誌

漣川縣東十里玄溪之上清華山下有吾家六世昭
穆之葬祖考府君衣履三遷而從先兆用遂骨肉同

聚之素願焉府君諱善養字士浩我洪出自中國唐
宣宗遣八學士教國人洪氏乃其一也家南陽而籍
焉以高麗太師諱殷悅爲鼻祖曾孫諱復禮史累傳
至諱由道隨恭愍王燕邸錄勳密直司事有孫諱溟
入本朝判漢城府尹理京兆卜宅于崇教坊子孫
世居焉生莊襄公諱師錫有文武全才受獻陵顧
命歷二世有諱以平司成以經術德行與戊午諸賢
并稱二十八宿生諱德潤宗廟署令兩世并贈
吏曹判書生諱仁恕戶曹判書壬辰扈駕卒于龍
灣辭錄勳爲穆陵各臣卽府君六世祖也生諱邁

洪州牧使生諱汝龜丙丁後秉義自靖世稱大明
處士長子諱泰元通德郎次子諱泰亨生員通德公
妙齡殉孝旌閭取生員公子諱重塚爲嗣亦弱冠
而歿贈司僕寺正生諱尙彥三登縣令贈左贊
成配順天金氏通德郎載重女左議政承憲其先祖
也英宗三年丁未舉公于漢師里第甲戌增廣中
生員試姻親有將任送樂助歡府君辭曰小成不過
一時悅親而親在任所何用張樂屢掌太學議䟽論
羣小營救辛壬餘孽之罪由是積被一邊人齟齬屢
入寢郎望未蒙點亦由此故云癸未丁外艱乙

酉授 康陵叅奉例調繕工監副奉事尚瑞院直長
以微嘗見罷旋除司饗院直長陞尚衣院主簿轉義
禁府都事掌樂院主簿遷刑曹佐郎浚訟公明判堂
沈公鏞頌府君子籌座曰洪某聰明端詳靡適不宜
必當大闡非久於郎潛者云時有 親鞫 上命秋
曹八府君以刑房郎替行問郎事周旋敏速奏對明
暢 上稱善不休壬辰拜禮安縣監治尚愷悌上下
孚感大繕公廨不勞一民民不知有役丙申丁內艱
于任所服闋除司藁寺主簿儀賓府都事 貞陵令
廣興倉守甲辰除宜寧縣監宐處嶺陬邑鉅俗頑公

治以治禮之法而尚嚴值歲大侵撫綏安接雅言荒
歲之民莫尚於不擾不擾莫尚於不責納設賑末務
也公賦外納官者并許蠲免按使問公私賑優否府
君曰公賑卽是正道私賑辦穀終涉料販只知有公
賑不知有私賑也按使靳持府君不報營蓄官廩衙
眷計口而食餘皆入賑資又以準直預賀各營耗穀
及邸價穀多般拮据濟活累千人時飢民多染癘府
君每冒危難臨賑子弟諫不聽其爲民國不自恤如
此繡衣道伯俱啓善賑狀準職有 命邑人攻石頌
惠丁未陞載寧郡守郡坪多宮庄鄉俗好干囑府君

用一切法靡所撓改境有唐灘舟楫通于箕城民咸
願立市證期設場與鳳山之銀坡接壤屬民富饒者
以兩市并日慮欠專利沮毀乃已按使入其說至遣
幕裨於唐灘揮旗罷市府君以去就爭之按使知不
可奪寢罷市之舉唐灘成大市爲載民無量之惠邑
多富戶有稱巡營幕屬嚇以索賂蕩產者甚多府君
嚴法峻繩推尋賂錢民戶賴以安業繡衣啓聞其狀
庚戌陞黃州牧使時有以守令乘屋轎臺言申禁
朝家令諸道俾之首實府君未曾乘有屋而嫌分疎
控實 教曰某是戚姻也當用加倍之律特罷其職

他倅之倅免者媿慙不已咸以此躋府君辛亥拜清
州牧使周歲而遞癸丑辟壯勇營從事官營以宿衛
重地將郎極一時之選府君管營金穀侍 帳殿考
試兢惕靡懈移尙衣院僉正又辟爲宣惠郎戊午七
月十四日終于養生坊第正寢壽七十二 孝懿聖
母致賻又下襚衣遣姪宗善爲文侑祭哀榮俱備九
月附葬于玄溪己未遷于仁聖洞又遷于北面馬渴
里又遷于玄溪乾坐府君性於孝以兩世獨身被父
母鍾愛而克修子職雖囊篋細瑣靡不躬檢贊成公
戒其服勞致疾而不少自逸金夫人夙嬰貞疾府君

書夜侍側視其被服厚薄食品硬軟罔不調適尋醫問藥靡極不至雖以術而亢者乎感自來切脈論證親執刀圭不許人替曆錄形證差劇匙箸多少日較月比用驗衰旺分數若是者五十年奉板輿于禮安任所孝養備至親心每眷戀親懿則獻以廩俸資其所施與其先意承順如此癘候漸革每拱手祝天掌爲之血及喪毀瘠幾滅性金夫人氣貌凜若不保朝夕而享壽八耄咸謂府君純孝攸致云蚤治博士業聲譽播著皆期以大闡而積歲侍湯靡違進取親沒而廢舉掌銓者聞府君年至筮仕欲擬齊卽府君讓

與尊行銓長寶之移其擬于尊行人皆感服歷官內外不求赫譽而咸有遺愛處上官僚案務盡和敬而有所挾者則不少撓屈亦不苟同有內懷不悅者而亦不屑也罕交遊慎言語朋知間相爾汝者絕少常病世俗握手附耳之狀戒子孫曰末路友道先喪而今人交際專事狎昵其可乎褻語慢辭未或發口故久而益敬城府坦蕩和氣滿容言笑溫潤接人無賤貴親疎之殊焉族戚告貧靡所慳無有乃已庀其昏喪殫盡事力屢典州郡閭無阻禁窮者如歸家而虛心款接罔不醉德而服義性愛閒靜晚歲以書畫花

竹自誤杖屨園亭悠然有出塵之趣人物雖黃時政得失未或掛齒蓋以地近戚畹而尤自謹約也平生不通關節忘懷得喪聞人奔走權門苞苴鑽刺若將免焉見俗吏以損下益上自銜者痛斥不已嚴於辭受苟涉非理絲髮不取切姻有管金穀甲兵十數年而一赫蹄不及其人歎府君清操非今世所有云府君雅言干囑求乞非士夫事於此不嚴餘無足觀非公幹不出戶庭蚤起盥櫛衣冠竟日端坐几案書帙咸有位置堂室軒窓不留纖塵作字齊整好戲翰墨亦無潦草可驗心力精密也教子孫雖微過不少寬

假不許以褻服見不令閒漫追逐長胤典數邑始欲就養因歲儉不肯往教曰吾家食不使汝憂餽廩盡付賑資濟活饑氓斯爲報 國恩承父志之道并朔例饌羞而不許送致焉可見其踐述之真正也配平山申氏通德郎鏞之女判書思簡公浩其先祖也先府君三年生先府君四十九年卒始葬玄溪先塋局內未坐後遷附于府君墓右孝順慈謙有女士風无旨繼配全州李氏通德郎鐸之女 世宗別子翼峴君璉其先祖也生後府君六年卒先府君十三年清明樂愷閩範咸備附葬于府君墓左舉三男三女長

履簡同敦寧 贈吏曹判書次鼎簡縣監次濟簡通
德郎女適金載象進士沈能基完城君燧判書男直
弼謬蒙 旌招躋上卿不敢起女適縣監金泰根尹
約烈庶子若弼前主簿庶女適武科李敬愚縣監男
翼弼縣令庶子爽弼營將通德男允弼金載象男鏞
鏞二女參判鄭漪申錫久直弼系子一純前縣令女
進士閔慶鎬翼弼系子一貞女沈興澤庶女徐康輔
爽弼男一寧一成女宋載純李甲愚主簿沈能恂允
弼系子一曾一純系子取秀餘不錄府君德性渾厚
氣象寬綽篤於天倫確乎素履奉親祭先則先質而

後交接人御物則誠中而發外才美內蘊而恥於自
衒進取有階而安於守分其心以爲行己處事寧拙
無巧寧約無夸寧失於密無失於踈寧失於拘無失
於苟考諸表裏明白純粹無不可對人言者府君自
號默窩底幾默而成之存乎德行小子何敢述焉先
考嘗詔不肖曰世無卓然可以不朽人者無寧子孫
自作之爲安歷選并時知德者寥寥於是體先考遺
意爲府君玄隧之誌用備陵谷之易焉

仲父縣監府君墓誌銘 并序 ○丁未

先仲父府君卒而墓于漣川之雞山嗣子翼弼屬直

弼述幽堂之誌翼弼死爲十九歲而文不克就常恐
風燭奄及竟抱幽明之恨遂力疾而敘之曰公諱鼎
簡字稚和以 英宗乙亥五月十一日生癸卯始舉
生員試辛酉筮仕爲 長陵叅奉壬戌轉繕工監奉
事換中部都事陞掌樂院主簿乙丑出爲永春縣監
丁卯十一月十日卒于官春秋五十三始葬于楊州
楚卽己巳遷于雞山西坐公爲人溫潤樂易行誼克
修事父母祇順無違處昆弟友悌甚篤專於養志先
意承奉及異宮猶不懈定省每侍側色容怡愉先考
甚安之先妣積歲臥床公攢手禱天掌爲之血事伯

氏如父日相對湛樂不以風雨寒暑而曠省季妹嬰
奇疾恆懷隱痛視遇有加愛兄弟之子無間已出推
之中表諸親務盡敦嫻及莅邑其來如歸隨求輒應
不少示倦但不病公也先考嘗修潤世譜公奉筆硯
以助其役竟底就緒居恒守拙罕交遊藝藏否久要
貴顯則不輒還往人病其坦率而不恤也少治博士
業長於詞賦累躋省門泮製占魁因違簾不遂亦不
以得喪撓懷晚補蔭仕惟奉公恪謹絕不要術做邑
亦不求赫譽不事苛辦爲民興利除害惟恐不及有
古循良風故爲上司所賞重及喪一境士民莫不奔

走號哭啓劄爭來致奠扶擁轎車久而興懷不忘公
素澹於宦情每以晚暮形役爲恥與我先君樹屋巖
江用圖晚隱而未就焉我洪系出南陽以高麗太師
諱殷悅爲初祖曾孫諱腹禮史奕世赫焉至諱溟八
本朝首拜漢城府判尹卜宅崇教坊子孫世居焉歷
莊襄公諱師錫受 獻陵顧命司成諱以平戶曹判
書諱仁恕名德相襲判書公有孫諱汝龜丙丁後停
身自靖遯于清華山中人稱 大明遺民卽公五代
祖也高祖諱泰元不勝喪以孝 旌閭會祖諱重琛
負雋望弱冠而卒 贈司僕寺正祖諱尙彥三登縣

令 贈左贊成考諱善養黃州牧使 贈吏曹叅判
叅判公有二配平山申氏通德郎鎭之女無育全州
李氏通德郎鐸之女公卽其第二男也公亦有二配
全義李氏其考縣監潤明生後公二年歿先公二十
三年始葬玄沙先兆遷于楊州綠楊驛至己巳附公
墓左舉一男翼弼昌平縣令繼配韓山李氏其考通
德郎重載生後公十年歿後公三十八年別葬始興
白馬山長坐舉三男俱歿兩淑人咸著壺範公有庶
子爽弼武科營將翼弼繼子一貞女適沈興澤庶女
李宜敏徐康輔營將男一寧一成女適宋在純李甲

愚沈能恂主簿嗚呼公有至性惇行而不自標樹不設畦畛考諸閩域無毫髮不真卽其襲美于家庭者如此雖無師友麗澤之益暗契道義者多語云人樂有賢父兄信哉銘曰

我家傳世仁厚爲基惟公克承寔由天彝日用常行無所爲爲出而爲政一此爲規大裕於民於已則虧惜其短造罔克普施一方哀慕淚濕靈輶歸隱江湖晚計差隳眞性所存人豈能知撮凡攷實兄子爲詩敬納玄隧休聞永垂

季父通德郎府君墓誌銘

并序○丁未

我季父通德郎府君隱居養親居南邨三十年里中諸士友論質直篤行君子輒曰汝楫汝楫公字也諱濟簡我洪胄于高麗太師諱殷悅懿美相禪爲世巨闕入 本朝漢城府判尹諱溟莊襄公諱師錫可成諱以平戶曹判書諱仁恕最顯判書公有孫諱汝龜丁丑後遜世自靖人稱 大明處士再傳至諱重採贈司僕寺正生諱尚彥三登縣令 贈左贊成生諱善養黃州牧使 贈吏曹叅判卽公三世也叅判公元配平山申氏无育繼配全州李氏通德郎鐸之女舉三男公其季也公以 英宗壬午五月十七日生

正廟庚申四月二十日卒春秋三十九六月葬于楊州松山孝子峯北丙坐配迎日鄭氏處士洵其考也附公墓左別有誌男允弼早歿系子一曾一曾子永秀公幼而娟好肌膚玉雪經痘患幾殊形神俱幻而孝梯天植侍寢數十年不離側淡愛溢於色辭然以其負性帶氣於父兄猶責難察判公處以爭子及經內外艱以事考妣者事伯仲氏及丘嫂伯氏命吸烟茶于傍而公不從友姊妹篤摯視兄子如子立塾師教孤甥恩意惻款漳丘墳庵歲久而毀公仰贊父兄相度事宏櫛沐風雨不憚勞苦躬自董役重建丙舍

敬桑梓養松楸出於至誠鄉黨宗族莫不感服好施與急人之難甚於己私有稱哭子於旅無以斂形公貸錢帛以副之後聞其僞而亦不悔也其厚施而忘報者如此常信人如己故往往見欺而雅言君子可欺以其方不受欺非君子也少發解路於南省忌懷得失優遊自適有太陽證每傷下急而中肩則坦蕩亦能忘怒觀理不苟合當世酒後或鼓琴吹笙宣曾中之醜礪才藝絕人不役心于名物度數而多妙悟創意制作自造其真通趨勒之妙習金生筆而亦不屑屑爲也自號隱庵擬霞舉于玉流山中取近先瑩

爲畢命計竟不就子曰惟孝友于兄弟是亦爲政奚
其爲爲政蓋聖人之意以爲人之未達而處于家者
苟能修其孝悌之道則是亦與仕宦而爲政者無異
又何慕外至之功名哉直弼弱冠謝功令願守身求
志公警策疎厲或懶於進修戒以畫虎不成訓辭拳
切常若鞭影之在背及此垂死志業荒墜將無以歸
拜泉下嗚呼歎矣遂力疾而爲之銘曰

曰惟孝悌爲爲仁本惟公則之垂一家憲其行必果
其言必信已諾必誠赴士阨困人或病公有踰繩準
是亦可見志氣骯髒小子昏耄曷敢摹狀徵于月朝

惟德是象德則多有胡靳遐景山名孝子孝子攸藏
列辭幽墟千禩其永

從弟成伯墓誌銘

并序

維揚州南十里鰲谷之原卽吾從父弟允弼之藏也
余每展墓漳州路出其下繞墳而呼成伯低回久之
未忍去成伯君字也癯淹垂死不可以頓省遂力疾
而爲之敘曰我洪胄于高麗太師諱殷悅遂爲南陽
巨閥入 本朝有諱溟漢城判尹諱師錫莊襄公諱
以平成均司成諱仁恕戶曹判書咸以德業顯再傳
至諱汝龜丁丑下城入清華山中畢生自靖世號

大明處士是爲君六世祖也會祖諱尙彥三登縣令
贈左贊成祖諱善養黃州牧使 贈吏曹參判考諱
濟簡通德郎號隱庵隱庵公娶延日鄭氏洵女舉君
于叅判公載寧任所生而善病患痘瀕危叅判公稱
其骨格無殊相竟回甦十三歲而孤庚寅十二月十
日歿距其生戊申八月十九日爲四十三歲權厝通
德公兆次翌年始窆室恩津宋氏處士五圭女允齋
文正公七世孫也無育取族子一曾爲嗣君有至性
常以早孤爲至慟以末疾崇于豆泡終身不服豆泡
不離偏親左右夜則侍寢鄭孺人年邵廢視君躬自

扶將用僂其起居寢餐或讀諺裨以娛之啜菽飲水
以盡歡不以貧乏見于色辭備製歲月殆無遺憾天
資冲慤與物無競待人和易不設畦畛而亦有性氣
往往任情自遂余教以矯揉晚頗知悔而君遽歿天
余與君同案而食聯衾而寢亦授君以經史而無所
成名卽余責耳詎但爲後死之悲哉銘曰
吁嗟吾弟守樸舍醇無欲無憂無喪天真惟孝由性
深愛朏朏胡不終養齋恨病親哀命之短欲叫蒼旻
和淚納銘永世不湮

從弟縣令君墓誌銘 并序

允汝之墓已宿十六年草矣蕪沒荒原樵牧不禁孰知伊人之爲可惜哉余始視窆擬銘其藏而哀不能文及此垂死力疾而敘之曰君名翼弼字翊汝初名龍弼字允汝以允汝行洪氏貫南陽者出自高麗太師諱殷悅至諱溟入本朝首拜漢城判尹諱師錫莊襄公諱以平成均司成戊子士禍被黜而終有孫諱仁恕戶曹判書判書公又有孫諱汝龜丁丑構成入清華山中以自靖世稱大明處士處士公有二子諱泰元殉孝旌閭諱泰亨成均生員生員公生諱重採贈司僕寺正爲伯父后卽君高祖也曾祖

諱尚彥三登縣令贈左贊成祖諱善養黃州牧使贈吏曹叅判叅判公生諱鼎簡永春縣監縣監公有二配全義李氏縣監潤明女韓山李氏重載女君元配出也君夙慧纒髻喜讀書英暢有韻折祖考愛賞不離側客至皆聳聽及長治詞賦有聲膠庠間中乙丑增廣試生員癸酉筮仕爲光陵叅奉轉長興庫奉事換北部都事陞掌樂司僕主簿轉戶曹佐郎典牲署判官英陵令昌平縣令處官壹心營職施措中窳爲上官所倚仗昌平民少糴多幾無邑君講究矯揉道伯李公書九贊其規劃移糶列邑民始聊

生值疹氣大行劑藥以濟死邑設科不煩民力具試
紙給邑子之貧不能辦者李公信君公明當薦士謀
及君君覈各實以應之一路洽然稱得壬午罷遞
後御史沈英錫褒啓其行治邑民亦勒石頌惠乙酉
七月二十七日歿距其生戊戌六月十三日爲四十
八歲八月葬于揚州外松山孝子峯下室高靈申氏
叅判益彬女生一女適沈興澤系子一貞庶女李宐
敏徐康輔君爲人開通揚逸且有至行八歲失恃持
喪如成人喪畢入廟輒攀主而泣移孝于異顏之地
養極志物庭無間言性疎於財睦嫻任恤咸盡其心

當發施雖千金不爲毫髮顧戀往往不自量力余每
舉朱子訓與人無節則取於人亦無節者而戒之君
終不改度趨人之急甚於己私作宰愈愛施家食益
艱而不恤病革猶覓債以成人之婚遇會心人雖隸
徒僮僕傾出肺肝不設畦畛以故人樂爲用好交遊
清濁無所失而中有權衡特青白不形也有童年友
貴顯者君薄其爲人每瞰亾而訪焉余責其不誠曰
不欲見則不當往往必瞰亾不如初不往之爲正也
君服而無斃焉君嘗請齋號余取守身爲大之義而
名之曰守窩君粗存防限斯爲顧名而思義歟是可

以爲銘銘曰

泛愛博施而克篤於天倫同流合汙而能知有吾身
考諸日用常行恂恂敦厚藹然不失滿腔之仁信能
裁之以理而守之以約則庶幾追踵乎古人惟其分
數明故不迷於好惡吁嗟乎君

庶從兄營將墓誌銘

并序

嗚呼此吾庶從兄故大邱鎮營將洪君爽弼字爽汝
之藏也爽汝沒已二十年而人事之變有不可勝言
者獨余生存無以塞後死責悲夫我洪系出南陽初
祖高麗太師諱殷悅八 本朝漢城判尹諱漠莊襄

公諱師錫戶曹判書諱仁恕以德業顯至三登縣令
贈左贊成諱尙彥黃州牧使 贈吏曹叅判諱善養

卽我曾祖祖考也叅判公仲子諱鼎簡永春縣監君
縣監公側室子也君以 英宗乙未十二月十七日
生中辛未庭試武科歷仕爲訓練院主簿判官出爲
長淵縣監換機張陞折衝階爲大邱鎮營將移忠壯
將道伯李公在秀勸君解官辟爲幕賓隨巡部到漆
原邑站被馬踢而歿卽辛巳八月十八日也權厝于
漣川北面馬山壬午二月葬于同山某坐室全義李
氏厚植女判書潤成其祖也晝哭暮年竟自裁而附

別有誌二子一寧後君一日死一成後君五月生三
女宋在純李甲愚沈能恂君生質直諒性又慧悟不
甚劬書而已通旨義措諸事爲靡不通曉我先考府
君愛君殊絕服事左右先意承奉每宦遊輒以君隨
一日無君於側則不安也府君儕友之爲方岳者多
辟君佐幕久而益親信及做邑經事綜物濟以廉潔
修舊起廢靡政不舉上下孚格聲譽載路道伯皆真
心愛賞每當考績據例廉問列邑至君則曰何用問
爲直施絕褒其所見信如此嶺中將行量田道伯要
試君才畀以近邑經界君講究時宜指揮已定而因

朝令旋罷君每歎其成算之無施焉君形貌短弱而
粗有膽畧遇事果敢雅言男子苟能立得志定事無
不可做者有進而無退冬月舉緬親墓且設石儀急
峽石棧行路崎嶇而君衝虎豹冒冰雪卒以竣事事
到手不少持疑又多氣義好施與急人之難甚於已
憂亦未嘗視冷煖爲厚薄也典數邑家益落妻子寒
餓而亦無憾容居恆持躬如有繩墨者嘗歎士夫名
檢掃地少與貴戚子弟交好見其赫赭不復踵其門
愛慕儒者陪李文簡公始源巡部至驪鄉納拜中洲
李公尊信文簡公胤子大隱公鳳秀謂是當世第一

流大隱公以義城倅到觀察營君以本鎮討捕使挾
用請學大隱公苦辭傳爲營中勝事云君以柔濟剛
存心愛物又篤於天倫宜蒙天祐吉無不利而竟不
得其死父子且間日并命酷禍慘烈殆甚於兵燹報
施之舛其何如哉卿士之識君爲人者莫不齎嗟惜
其不盡於用也余與君異體一身非直禮服各羣從
也嘗願携手歸隱畢命於梅山松楸君躬創丙舍有
多少準擬而君遽歿矣葬君子其所而余未忍獨往
俛俛餘生疇與爲歸自悼身世靡遑爲君悲也攬涕
而爲之銘銘曰

韎韞其身仁禮存心才非硜硜居常欽欽所以烈婦
舍命遂志化行刑家乃其自致未究厥用惜局年地
我述銘章用闡厥美

幼子一漢壙誌 庚辰

嗚呼此唐城洪直兩幼子一漢之瘞也其父世爲冢
嗣三十而無子常憂宗祧靡托其母李氏夢神人來
告戊辰當生男子果以是年五月四日舉兒于漢師
之竹洞里第生而清秀眉眼疎朗及過數月若有智
息日開而敦厚端重之象見焉充其資庶可以有受
意者克世我家以永文獻之傳距其生九月而死卽

己巳正月十七日也死數日埋于漣川清華山先兆
之側嗚呼惜哉其父遂無子八世邱墓四世祠廟無
所於屬嗚呼酷矣自得姓以來氣脉相禪者爲屢十
年至一漢死而血胤永絕嗚呼天平曷其有極疾其
父殃孽積躬降罰而奪之斯亟因又勦滅厥後是可
以驗天道耶摧腸銷骨十年如一日庚辰五月病淹
越中痛甚心弱投血爲誌將以掩諸窆云

外祖母孺人鄭氏墓誌銘

并序○乙未

外祖母孺人鄭氏卒後十年而胤子正言公又卒正
言公純於孝宐有狀以述孺人之行而哀不能文嘗

屬直弼爲墓誌直弼間違喪病因循未就常恐風燭
奄及永負幽明援筆而敘之曰孺人系出海州鼻祖
諱肅高麗典法正郎入我朝有諱易左贊成集賢
殿大提學贊成公有孫諱棕寧陽尉寧陽有子諱詹
壽海平府院君昭平公於孺人九世祖也祖諱來泰
考諱運徽皆隱德不仕妣驪興閔氏震煌女也英
宗辛亥五月十日生年十七歸于我外祖父知足堂
朴公奉箕箒二十四年而知堂公卒稱未亡人者四
十三年純廟壬申正月二十八日捐世壽八十二
歲越三月權窆于楊根西終面楸洞是歲十月甲子

始合祔于午坐原知堂公諱亮欽陰城人吏曹判書
忠愍公諱淳之後 贈持平諱廷琬其考也知堂公
初娶陽川許氏有子鳴漢奉事繼娶孺人生二男二
女男長聲漢正言爲季父進士公後次夭女長適同
敦寧洪履簡卽直弼先考也次適金台柱正言男來
五爲伯父奉事公後系子來教來五男承赫進士來
教系子民赫二女適李種信韓胤錫同敦寧男直弼
前洗馬二女適縣監金泰根尹約烈金台柱系子魯
爽孺人幼有至性事父母盡孝及歸痛未逮事尊姑
事繼姑愛敬洞屬靡極不至繼姑感歎曰真孝婦也

及嗣中饋不動聲色而閫政自理尤殫誠承祭漑濯
烹茗罔不躬莅將事之日植立徹宵家奉廢主廟廟
事彌恭且嚴嘗云方祭假寐則常見羽衛羅列儼若
黼座是豈不虔而可冀顧享於且云昏朝事皆因羣
下逢惡而致然非專歸罪於廢主者也爲之屢歎爲
諱禮也事知堂公秉順率禮相對如嚴賓知堂公敦
睦好義待以舉火者甚衆食客常充滿堂字孺人以
奉其意猶自以爲不足也每見人飢寒折甘分少恐
不及時踈宗遠戚以婚嫁入京者莫不以孺人爲歸
孺人亦莫不盡心拮据雖父母不能過焉以故體無

重襲盤無餘膳常常空乏而亦不恤也繼姑有一女
鍾愛及嫁資裝極盛且盡分女奴孺人惟順厥志色
絕幾微繼姑歿以所愛愛少姑而爲之資益者彌加
同寢食以終老焉少姑事孺人如母動靜語默惟孺
人之爲聽季胤過房而於其所後母肫肫無間言娣
姒妯娌之間酸醜不齊事或有至難言而夫人開心
見誠調劑得適長胤幼失恃善病孺人至心保養克
底成立人不知其不出於其腹也以及知堂公賤產
而一視已出冢婦積傷歿因無子姓病火偏急孺
人不言而教以致孚感一家上下融融洽洽求其一

毫厭數者無有也愛子孫甚篤而亦未嘗以恩掩義
有過輒訶責有善亦未嘗苟譽待女婿亦以賓禮見
不交閑語用存左扉之義焉御臧獲極厚不督其過
失亦不加惡言至偷竊其嫁時物而猶不罪焉存心
愛物雖昆蟲之微亦不身踐居恒克勤克儉不憚苦
勞無斯須暇逸年邵權淹而猶不廢女紅侍者請少
休則曰我習此不知疲也每戒人以宴安廢事雖晦
養閨閣而每語及 宗國於邑不已及疾革值關西
流賊猖獗京師震動孺人昏沉不省而曰勿憂也行
且平定矣發於夢嚙者乃爾其言果驗嗚呼孺人醇

德懿行有不可勝書而小子生晚不肖不能盡平生之美述耳目攸逮者卓然爲女師矜式乎簪珥而生而抱崩城之痛以畢其生歿而後承孤子不絕如綫且不得鳩筆闡發幽潛圖不朽於永遠悲哉小子被養於孺人顧復鞠育昊天罔極非直缺缺之思寔鍾厥心而已間閱百變滄桑而頑忍不死乃欲和淚濡毫纂次其言行何能述焉銘曰

昔人有言漆室緹縈烈女也及爲婦則無聞伯宗梁鴻之妻哲婦也及爲母則無聞文伯孟氏之親賢母也爲婦時亦無聞今孺人爲女則孝順爲婦則誠謹爲母則以身爲教具茲三美可以冠閨楣小子敬述敢告彤管

先妣墓誌追記 庚午

嗚呼此吾先妣墓誌而先師近齋先生所爲述也幽顯闡微庶不朽於億世於戲盛哉文成於戊午而納窆於今日者以有待也小子不肖筮宅非地壬戌再遷于永平金柱山丁卯八月二十六日三遷于陽城升良院天德山之北負巽之原卜云其吉將與天地同其悠久者也吾大人今爲密陽府使金泰根生一男一女尹約烈妻早切無育不肖舉五子女并不育

嗚呼以吾母氏德善宜其壽考昌熾以膺多福而因不肖獲戾罔克受祐不孝之罪於是乎爲大矣嗚呼天道無親常與善人母氏不食之報其有俟於將來歟并原誌燔爲八片盛以瓷缸埋于壙南圖厥傳于無疆昊天罔極嗚呼痛哉

季母孺人鄭氏墓誌銘

并序 ○庚子

詩序贊二南婦人之德曰已嫁孝不衰於父母夫已嫁而猶孝於父母况未嫁乎及嫁而事舅姑者又可知也以余觀於并世婦女其如詩序所稱未有若吾季母鄭孺人者孺人系出延日鼻祖均之麗朝平章

事入 本朝有諱洪謚恭簡恭簡子諱淵兵曹判書至諱始成江原監司并傳至左尹諱守松卽孺人曾祖也祖諱師良考諱洵妣潘南朴氏師淳之女也孺人旣笄而歸南陽洪公諱濟簡卽吾季父也季父號隱庵三登縣令 贈左贊成諱尚彥黃州牧使 贈吏曹叅判諱善養隱庵公祖禰也孺人以 英宗辛巳九月二十二日生四十而寡癸巳二月二十六日終四月葬于楊州松山孝子峯下丙坐卽隱庵公墓左也淑人慈良貞介濟以聰慧事父母先意承順祖考處士公遜世高蹈鍾愛孺人殊絕尊姑貞夫人壺

範甚備而孺人勿少逆怠用適厥性常許以孝敬孺人以逮事未久爲至痛事吾先妣如事尊姑母敢敵耦同爨十年庭無間言及先妣捐世孺人亦嘗代幹中饋供養尊舅克殫誠力而聲氣不出壺闥隱庵公性度篤厚而往往卞急對賓友促設酒食咄嗟取辦而無難色君子澹於進取將成鹿門之隱孺人樂以從之常恨其未遂願也隱庵公乳媪性褊老妄於孺人不恭而有順無校人以爲難焉崩城泣血每欲自裁而以嗣子冲蕤未克下從爲平生至慟焉及嗣子死孺人已躋七耄廢視者幾十歲泣言吾隱忍苟活

者爲孤兒成立身又絕血胤當少須臾無死待立嗣孫俾不殄夫子之祀因強餐理遺者數年飲食動作皆須人而神閒氣定處之若命以弟姪俱亡本宗絕祀日夜飲泣每謀及親屬用圖立嗣取養姪孫及時而嫁人不知其無母亦可見至性也李公晉淵用九孺人至親也每贊歎孺人純行而曰晚景所值非達觀君子所可忍而能處順循理無心學而乃爾哉余勸作隧誌發厝闡幽而用九又作秋栢之實矣常恐朝夕就溘俾孺人事行湮沒無傳力疾而爲之銘銘曰

恒其德貞我見義經女士則之用能久成貞吉之象
以平不平謹述斯義塚銘玄扃

伯姑母孺人墓誌銘

并序 庚子

維高陽治東元堂面書齋洞坐庚之原卽我伯姑母
孺人南陽洪氏之藏而祔于通德郎金公諱載象者
也孺人年十八歸于通德公十有九年而通德公歿
又三十九年而舉同穴之禮焉我洪肇自高麗太師
諱殷悅入 本朝有諱溟漢城判尹諱師錫莊襄公
諱以平成均可成諱仁恕戶曹判書咸以德業顯曾
祖諱重採 贈司僕寺正祖諱尙彥三登縣令 贈

左贊成考諱善養黃州牧使 贈吏曹叅判妣全州
李氏處士諱鐸其考也通德公延安大姓掌令諱灝
僖靖公諱相紳司書諱容其三世也孺人以 英宗
三十三年丁丑二月二十日生 純廟庚寅十月
二十日卒壽七十四舉二男二女男鏞鏞女適叅判
鄭漪申錫久鏞子廣淵鏞一子文淵鄭婿系子海尚
申婿子泰駿泰驥女金字善閔教彬廣淵三子并幼
孺人生稟溫柔孝悌天植長益沉靜安詳喜怒不遽
性又聰穎識解超悟甚爲父母所鍾愛夙通女工精
密疾速往往若神造旣歸媚于尊嫜不以窳賈而絕

甘旨勤勞拮据用供調度以未逮事先舅爲至慟事
兄公如事舅兄公亦蚤世無嗣嗣以鏞鏞冲菴孺人
當門戶塚飾家奠躬自措辦每承祭坐而達曙瘡老
而不弛其敬兄公晚而再聘年差數紀而恭執介婦
之禮有所授受必跪獻同爨屢十年庭無間言愛育
其孤女用底成立教子女以義方常訓二子曰兄弟
之倫孰不知重而施不見報則較故多不保終同宮
者尤宜識戒又曰科宦非所期望篤學力踐不失爲
謹飭之士是爲福慶也二子累不利南省而亦不介
意家常空乏而不以甌窶瑣細向人屑屑二子或自

謀生必問所從出若涉非義嚴斥而不少饒晚年受
長女孝養而常有不豫色待賓客篤厚家人有倦色
輒責之曰不誠無物况飲食乎無愧陶母截髮之義
聞者感服願與諸子攻業孺人隨我祖考四邑祖妣
下世祖考供奉專須孺人孺人竭誠力靡極不至祖
考甚安之不知有鰥苦築室于傍不暫離曠事我先
君亦盡遜悌有事無小大先君輒咨諏孺人無不中
節一門視爲女師焉我季姑母得奇疾孺人保抱調
護忘身之痼瘕視諸姪如己子愍惻季姪孤弱每溢
于色辭吾先妣厄於孽兒生三日被養於孺人孺人

撫育恩叅造化四歲而歿孺人爲終身痛語至輒法
然始吾曾祖妣金氏至德範世亦有鑑識諸孫中愛
孺人殊絕孺人每云吾顏貌言動酷肖我祖母竟致
年數相符亦可異焉嗚呼孺人醇德惇行宜享純嘏
永孚于休而中身崩城晝燭欲滅何憾之叢何艱之
棘而終躋大耋子女俱老大孫曾又繞膝天道報善
其在斯歟述孺人狀泣請余爲誌瘞淹垂死靡遑
爲文常恐風燭奄及留恨千古力疾而爲之銘銘曰
世教之喪先隕壺彝咸遂性偏好惡皆私憲憲我姑
神定心怡命道之舛以安易危天民之窮蹈險若夷

如綿裹鐵中有操持不待詩禮學而後知知之所至
百行罔虧不動聲色孚感簾帷尊卑俱協小大并宜
六親咸頌是則是儀克肖典刑王母之貽惟其慕之
是以似之晚享多福考終于期有幽冥宅君子是隨
有姪述銘敢盜厥辭

舅母河東鄭氏墓誌銘

并序○庚子

故司諫院正言朴公諱聲漢卒而葬于楊州治南九
井里龍馬峯下負甲之原後十六年丙申十二月九
日繼配淑人河東鄭氏享年七十五而卒于長興坊
本第越明年丁酉二月甲戌始舉曾附其女公之子

唐城洪直弼敘其行而埋其側曰嗚呼我外王母鄭碩人有醇德懿識教育子女咸以義方淑人既歸惟姑訓是儀鄭碩人喪長子就養于少胤卽正言公也正言公有至行養極志物鄭碩人邵齡癯淹動作專須淑人侍處扶持斯須不離者累十年冬夜嚴夏衣不解帶風爐冰竈爨必躬操設鼎鑪堂中用供洗腆必適所嗜奉以佐進數匙多寡以爲憂樂鄭碩人患痢而欲淑人護疾秤水廁牕不弛其勞忘食而不知餒顛踣而不自恤嘗糞甜苦以驗安危如是者幾半歲而鄭碩人乃瘳克享大耋人謂純孝攸致及喪哀

毀哭不絕聲孺慕終身語到輒流涕常以不及逮所后舅姑爲至痛薦誠蘋藻每親廟事宿齋預戒雖不克筋力爲禮必強起莅祭祭元配亦致誠恪敬奉君子先意承順躬行節儉而周恤窮乏待而舉火者甚衆正言公事諸姑及姊如母淑人亦事以尊嫜奉姑母室中同寢餐者數十年愛敬如一日是爲閨閤間所未有也伯姒性偏難事淑人務積和順不露圭角伯姒晚益孚感君子捷巍科持躬如處子或病其不事進取而淑人云處世顯榮非心所樂勉其不隨以成其高焉君子好賓客館穀者充衍堂室淑人竭力

措辦用供其費而無難色不俾君子知其艱也君子
晚而有所畜淑人逮下有恩以及臧獲入其門和氣
薰蒸有時雍之象焉淑人之先肇自高麗僉議芝衍
入我朝有領議政諱麟趾吏曹判書諱崇祖祖諱
錫福進士考諱肅霖以英宗三十七年壬午七月
三日生生而資性貞淑濟以聰慧被爺孃所鍾愛竈
陘失火家無人淑人取單衾沈水覆火而滅之其知
慮深遠已自冲齡如此正言公陰城名閎進士諱聖
龜贈持平諱廷琬進士諱長欽卽正言公三世而
正言公以知足堂諱亮欽之子爲仲父嗣焉元配延

日鄭氏無育淑人舉四男二女俱不育來五烏伯父
後者亦逾弱冠而歿有子承赫生員正言公養族子
于家立而爲嗣曰來教來教又無子繼子民赫二女
適李種信韓胤錫承赫一女民赫一子并幼淑人酷
閱殤憾殆人理所不堪而亦克達觀安之若命常誠
子孫曰母論人長短母待人怠慢當事必先人而後
己母望非分母服不衷母壞爾先人儉德以墜家聲
承赫懶於學必涕泣親撻是可以爲世章程者也直
弼被育于外王母宿食淑人所者有年淑人視遇如
己子每歎仁心仁聞浹于上下六親頌四隣服婦人

之事槩乎畢矣是無愧爲吾王母之賢婦也來教泣
請直弼爲隧誌直弼荷淑人知愛而孤負多矣惟將
蕪辭圖不朽于永遠悲夫銘曰

溫溫女德淑人是持憲憲君子淑人是允榮榮孤胤
淑人是師女婦母道咸中其儀衆美旣具孝爲綱維
晚享忠養考終期頤遺羸後嗣神理靡差百歲歸室
名德雙垂敢告彤史我銘在斯

外從妹貞夫人金氏墓誌銘

并序

外從妹貞夫人金氏以戊戌六月二十四日癸巳卒
于漢師冠里第之正寢臨終遺戒嗣子曰祖姑及尊

姑咸以踰月而葬吾亦不敢有越厥禮嗣子以前後
時勢之不倫未忍承命卜以八月辛巳祔窆于楊州
陵洞里某坐之原君子曰母子皆孝也孝當述先亦
宜順志而貴乎服正服正所以爲純孝也夫人系出
延安有諱濤中 皇明制科官密直提學厥後圭組
相襲至府使諱粹五正言諱灝僖靖公諱相紳司書
諱容連四世制科司書公生子諱載象有文行早世
娶牧使 贈吏曹叅判南陽洪公諱善養之女卽吾
姑母也洪孺人以 正宗戊戌二月二十九日舉夫
人于鑄子洞本第吾祖考奇其夙慧鍾愛殊絕教以

文字誦詩甚熟隨吾祖考三邑十五而孤十七歸于
侍郎鄭公諱漪祖姑金夫人生長法門壺範純備尊
姑清璿郡主性度莊嚴少許可夫人承奉兩世務隆
孝敬翼翼油油如恐不及及入 闕而謁 殿宮進
退周旋率以禮則 殿宮咸嘉賞寵賚甚盛每承
命進覲小心謹慎未嘗少懈服承重喪盡禮貴主繼
卒易戚俱備常以早歲失怙又不克逮事尊舅爲終
身至勵主第規度自大夏夏乎制閫而妙齡嗣饋勤
以綜之整以理之上事勿應咸盡其道以及內外親
黨莫不輸心竭懼無復物我相形下及婢僕咸誦其

德焉嘗從君子州邑清嚴自持簾門肅然亦未嘗數
年淹也君子晚謝簪組棲遑林壑而夫人亦與之偕
依然有鹿車之風焉雖君子遐情遠韻自成其高致
而夫人之助實與多焉侍郎公貫延日進士 贈贊
成諱祿庶尹 贈領議政諱麟煥興恩副尉諱在和
其三世也夫人舉男女俱歿取族子海尚爲嗣教以
義方靡極不至海尚前監察娶都正李羲斗女生二
女幼夫人稟質純懿端亮濟以寬厚尤篤於天倫洪
孺人顛覆崩城血泣致毀夫人婉愉在傍多方以娛
之賴以存全用意至到不以旣嫁而少衰養生喪死

必校於心友恤弟姪俾克成立與侍郎二姊同室至
愛孚感罔間於尊姑存歿以及其子女養育嫁娶用
殫誠力及病革聞女公之子奔生母喪極力以資其
行是所謂死者復起生者無愧也淹歲患乳形證累
變宛轉痛苦而靡所怛化亦無幾微色可驗素養之
正也識解朗徹洞曉古今世教汗隆人物臧否往往
不差其筆翰縫紉羣藝絕倫特其餘事也昔人所稱
爲女而女爲婦而婦爲妻而妻爲母而母即夫人之
謂而命不偕善絕其血胤是不能無憾於報施而嗣
子仁孝克稱厥家天道之定其在斯歟銘曰

懿哉夫人允矣女士四德俱全六親頌美律彼徽岡
永闕桂馥夫子在左靡間同隧我述其真用詔千禩

女端誠壙誌銘

端誠唐城洪直弼第四女也生而久不錫名余讀小
學而命之曰端誠取端一誠莊之義而願學太任而
至也余舉三女不育而端誠生故亦名端見于吾外
王母外王母愛之改錫以任誠誠夙慧於父母有潑
愛母送余出閨門勉之以安自學語時而已然不見
其或忘也家大人通判全州府誠慕之見于色辭要
吾庶母倩書以候及余往覲誠勉盭其歸及歸喜不

自勝昏晨造余所問起居與吾甥女相提携亦未嘗
闕至性然也以丁卯十月二十六日病痘痘未發而
死距其生癸亥十二月二十一日爲五歲也其質厚
其氣精其壽而福宜也坐其父積殃而歿噫豈其命
也以其父之命也程先生哭澶娘而曰人理之未至
者吾容當責命於天君子知命而猶責于天余小人
也安得不號天而自怨也耶嗚呼命不可說孰知其
極以死之第三日瘞于漣川清華山祖考妣兆右而
銘之曰

以汝何辜奪之斯早由我不識爲父之道

凶妹金氏婦墓誌銘

并序○戊子

吾妹淑人洪氏鎮安縣監金泰根伯元之元配吾先
子同敦寧府君諱履簡之長女也吾先妣貞夫人以
正宗戊戌六月二十七日丑時舉淑人于漢師之鑄
字洞第以克順于壽祖考甚喜名之曰孝生質自美
清明豈弟有潑愛於父母靡所違拂平居罕言笑或
對人含嘿終日賑賑而其中則辨臧否人物鮮不中
竅性隘不容人過失而亦未嘗藏怒焉聰悟絕倫一
聞人言行終身不忘不學而通諺書於女紅亦然嘗
傍聽余讀書略曉大義問無子命也何罪之有而列

諸七去之中乎其慧識多類此未嫁而先妣捐背隨先君任實任所守靈几號咷如不欲生三年而返京第歸于伯元仍挽鹿車于湖鄉又七年而覲先君子安城郡衙三年而復歸于湖伯元荐罹大故家益落往往蔬糲不繼而淑人安之若命伯元素性恬冲不以事物經心淑人自任閨政多方拮据養親祭先服勤盡誠不貽伯元憂養育伯元從子女失恃者無間已出己卯率子女歸寧時伯元遊宦在京將得邑聚眷而淑人積瘁成疾以庚辰七月十八日切臨死精爽不昧措置後事咸得其宜數年而伯元作宰享有

厚祿而淑人則不偕同貧賤而不同安樂悲夫淑人墓在保寧木忠面後谷乾坐之原生三男二不育炳愚序居第二二女適尹冕求趙秉履叅奉炳愚男厚均我洪貫南陽以高麗太師諱殷悅爲鼻祖曾祖三登縣令 贈左贊成諱尙彥祖考黃州牧使 贈吏曹叅判諱善養先妣陰城朴氏知堂處士諱亮欽其考也伯元安東人右議政文忠公諱尙容八世孫曾祖諱毅行雲泉處士 贈吏曹叅判祖考諱履成刑曹叅判考諱最淳通德郎嗚呼吾先妣受一部閨訓于知堂府君終身服習施及諸女淑人動罔悖而息

罔逾者得諸庭訓且性不屑不潔介而有守苟非吾
有一芥不取若爲男子身則當爲狷者見許於聖門
也然婦人之行含章而不外見且彤管之絕久矣孰
有續子政之列傳闡揚女中之清士乎吾兄弟七人
惟我在焉且抱釁床簀熒熒垂死不以時爲銘卽風
燭奄及其將使吾妹之賢掩翳於千古乎仍力疾和
淚書之如此俾炳愚納諸幽鳴呼是可以不朽吾妹
乎悲夫銘曰

嗟嗟吾妹哿矣貞剛遐不壽考百祿是將鬱彼新城
有屹鷹岡卜云其吉女士攸藏君子百歲同此幽堂
生雖不借歿則允臧報由不食佑啓无疆宜爾子孫
永世克昌

亾女閔氏婦墓誌銘 并序

驪興閔慶鎬士善妻南陽洪氏梅山居士女也以
純廟九年己巳十一月十二日申時生始居士五舉
子女不育而女生焉故象六數各之曰坤而配之以
喜者所以志也年十四歸于士善壬寅正月十九日
不起疾距其產女二十九日也生三男三女長泳和
今十四歲女二歲其餘皆死未成殤三月四日葬于
砥平縣內面松亭坐辛之原我洪系出高麗太師諱

殷悅縣令 贈左贊成諱尚彥牧使 贈吏曹參判
諱善養同敦寧諱履簡卽居士三世居士名直弼謬
蒙 旌招不敢起配全州李氏判書濫其考也士善
尊公原任吏曹參議名致文祖禮曹判書肅獻公諱
命燦曾祖同副承旨 贈吏曹判書諱百昌也孺人
生而氣貌凝重心如其貌性又寬厚孝悌天植最得
父母心我皇考常撫之曰恨不爲男子予以維持門
戶也及嫁閔氏族大且貴孺人入門藐然冲幼而淑
慎婉嫕善事諸尊長執婦道尤謹獲一味可口輒進
尊嫜承舅姑至愛而常懷兢惕事君子莊而不暱處

妯娌婦以壹是和順士善丘嫂歿于孺取養其遺孩
無間已出每歸寧未忍其相離式遄其還教獨子如
嚴父不假以色辭子患疹而欲焦心悴躬有十育之
勞而忘已疾之不可爲自知無幸招乳媪托女子又
以不克更拜父母舅姑爲至恨揮君子勿近用盡正
終之義至死而神精不爽焉幼有性氣而不形於色
洞辨人臧否而不言其過失士善累屈南省及登庠
亦不見其歡喜嫁二十年對本親一不道夫黨事是
出於素性非勉強爲也居恒未嘗修飾邊幅爲世俗
婦女態恂恂若無能而終日勤劬手不離女紅儉約

爲度罔或放忽苟充年壽可以嚮用庇家以成姻範
而厄於短造天道無徵嗚呼悲哉昔程伯子誌澶娘
之墓曰質端而厚氣溫而良舉動知思安靜沉遠殆
若老成衆皆意其福且壽固有莫可計者命矣孺人
德性近於澶娘而娘有父純公不朽於永世孺人也
因其父罪孽積躬移禍而死且閨門之行含章而不
外見孰知其真可惜哉士善將親命俾我爲壙誌煩
冤痛毒不忍泚筆而懼其終於泯滅且悼其穉子靡
所逮及含哀泣書以藏諸幽嗚呼是可以慰長逝於
無窮而盡父子之情乎銘曰

資成德器行符禮憲宏壽而福神理回舛永寧體魄
是爲畢願報在不食天祐其善矢辭玄隧子孫昌衍

庶從嫂全義李氏墓誌銘 并序○庚子

我庶從兄大邱鎮營將洪君爽弼爽汝有烈婦曰全
義李氏李氏痛夫不得其死日夕號擗如是者朞年
一日哭靈几聲絕而不出家人視之喘息已斷吐鹽
露滿口救藥而已無及卽壬午十二月二十二日距
其生癸巳爲五十也發其篋笥附身附棺凡含斂之
具罔不庀治越明年二月附葬夫墓父曰厚植祖曰
刑曹判書潤成吏曹判書金尚星其外祖也有二子

三女一寧一成宋在純李甲愚沈能恂李氏十九而歸于爽汝事我仲父母以孝或代幹中饋忠養臍摯先王考府君因喪而處仲父所李氏躬莅洗腆調適所嗜極其滋味府君常贊其美先君作宰全家隨往李氏輒守屋我歸洛同爨者累月每見叱嗟不出閫闕而衆事自理有若神閒氣定不動聲色亦見其才智過人也天資溫柔濟以明敏善酒漿織紵以養所天所天歷縣邑不營產業而李氏務極儉約分寸蓄力粗成家道婚嫁幾畢而爽汝死於非命此其所以決意下從也古之貞烈垂諸傳記者或毀髮膚不全

父母之遺體或露蹤蹟祇成溝瀆之微諒雖操存而身亾行立而形虧其能兼全其道終始無玷者豈矣如李氏之泯然無跡死得其所者非出一時意氣是所謂從容就義難於慷慨殺身者歟李尚書光文居比隣知其事甚悉訪余贊歎圖所以闡揚而李公亦卒矣其將掩翳而不章乎卽其一死師心幸已以靖獻于所天詎要騰彤管而揭丹雘哉銘曰嗟嗟賢媛遭命不辰哀哀崩城訴情穹旻致命遂志以淑厥身烈烈其節翼翼其仁有光門戶垂耀無垠非我述私用敘彝倫

